

77903/1083 (17)

CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

MAR 24 1958

英世三ノ十七



景岳全書

四十之四十二

小兒則上下



Faint bleed-through text from the reverse side of the page is visible through the paper. The text is arranged in vertical columns and is mostly illegible due to fading.



景岳

全書

小兒則目錄

景岳全書小兒則目錄

卷之四下

小兒上

總論

護養法

看小兒壽夭法

聲音

藥餌之誤

撮口臍風

景岳全書

景岳全書

哈佛大學

圖書館

初誕法

初生兒看病法

脈法

顏色

小兒診治大法

驚風

景岳全書小兒則目錄



論驚風證治 十三

急驚風 十四

慢驚風 十五

大驚卒恐 十六

驚啼 十七

發搐 十八

夜啼 十九

發熱 二十

外感發熱 二十一

外感發熱弗藥可愈 二十一

諸熱辨證 二十三

內熱證 二十四

小兒上論列方 二十五

卷之四十一

小兒下

吐瀉 二十六

霍亂吐瀉 二十七

論瀉利糞尿色 二十八

吐乳 二十九

五疳 三十

盜汗 三十一

腹脹腹痛 三十二

痞塊 三十三

癰癩 三十四

溺白 三十五

變蒸 三十六

小兒下論列方 三十七

景岳全書小兒則目錄終

目錄



景岳全書卷之四十謨集

會稽 張介賓 會卿著

會稽 魯 超 謙菴訂

小兒則 上

總論 一

小兒之病古人謂之啞科以其言語不能通病情不易測故曰  
寧治十男子莫治一婦人寧治十婦人莫治一小兒此甚言  
小兒之難也然以余較之則三者之中又為小兒為最易何



以見之蓋小兒之病非外感風寒則內傷飲食以至驚風吐瀉及寒熱疳癩之類不過數種且其臟氣清靈隨撥隨應但能確得其本而撮取之則一藥可愈非若男婦損傷積痼癡頑者之比余故謂其易也第人謂其難謂其難辨也余謂其易謂其易治也設或辨之不真則誠然難矣然辨之之法亦不過辨其表裏寒熱虛實六者洞然又何難治之有故凡外感者必有表證而無裏證如發熱頭痛抱急無汗或因風搖擗之類是也內傷者止有裏證而無表證如吐瀉腹脹脹滿驚疳積聚之類是也熱者必有熱證如熱渴躁煩秘結癰瘍

之類是也寒者必有寒證如清冷吐瀉無熱無煩惡心喜熱者是也凡此四者即表裏寒熱之證極易辨也然於四者之中尤惟虛實二字最為緊要蓋有形色之虛實有聲音之虛實有脈息之虛實如體質強盛與柔弱者有異也形色紅赤與青白者有異也聲音雄壯與短怯者有異也脈息滑實與虛細者有異也故必內察其脈候外觀其形氣中審其病情參此數者而精察之又何虛實之難辨哉必其果有實邪果有火證則不得不為治標然治標之法宜精簡輕銳適當其可及病則已毫毋犯其正氣斯為高手但見虛象便不可妄



行攻擊任意消耗若見之不真不可謂姑去其邪諒亦無害  
不知小兒以柔嫩之體氣血未堅臟腑甚脆略受傷殘萎謝  
極易一劑之謬尙不能堪而况其甚乎矧以方生之氣不思  
培植而但知剝削近則爲目下之害遠則遺終身之羸良可  
嘆也凡此者實求本之道誠幼科最要之肯綮雖言之若無  
奇異而何知者之茫然也故余於篇端首以爲言然非有冥  
冥之見者固不足以語此此其所以不易也

陰陽應象大論曰善診者察色按脈先別陰陽審清濁而知部  
分視喘息聽聲音而知所苦觀權衡規矩而知病所主○按

此論雖通言診法之要然尤於小兒爲最切也

### 初誕法二

小兒初生飲食未開胃氣未動是誠清虛之腑此時開口調燮  
極須得宜保嬰諸書皆云分娩之時口含血塊啼聲一出隨  
卽嚙下而毒伏於命門因致他日發爲驚風發熱痘疹等證  
此說固似有理然嬰兒通體無非血氣所結而此亦血氣之  
餘何以毒遽如是卽使嚙之亦必從便而出何以獨留爲害  
無足憑也惟是形體初成固當爲之清楚其法於未啼時用  
軟帛裹指挖去口中之血乃用後法并拭去口中穢惡以清



臟腑此亦初誕之要法不可無也

開口法凡小兒初誕宜以甘草細切少許用沸湯泡汁以淡爲妙不宜太甜乃用軟帛蘸汁徧拭口中去其穢濁隨用胡桃肉去皮嚼極爛以稀絹或薄紗包如小棗內兒口中使吮其汁非獨和中且能養臟最佳法也○若母氣素寒小兒清弱者只以淡薑湯拭口最能去胃寒通神明并可免吐瀉之患此法最妙人所未知也拭後仍用核桃法如前○一法以牛黃半分同硃砂研勻蜜調如前與吮爲佳極能辟痰邪去穢惡除熱安神然必母氣多熱小兒肥盛者可用清弱者不宜

用○一古法拭口多有用黃連者不知黃連大寒大苦而小兒以胃氣爲主安得初生卽可以苦劣之氣相犯致損胃氣則他日變嘔變瀉由此而起矣大非所宜○一古法多用硃砂開口者按陳文中曰小兒初生便服硃砂輕粉白蜜黃連本欲下胎毒不知此皆傷脾敗陽之藥輕粉下痰損心硃砂下涎損神兒實者服之軟弱弱者服之易傷反致變生諸病是固不可不察也

護養法

三

出保嬰撮要

巢氏曰小兒初生肌膚未實宜用舊絮護其背不可太煖更宜



全書卷四十一  
數見風日則血氣剛強肌肉緻密若藏於重幃密室或厚衣  
過煖則筋骨軟脆不任風寒多易致病衣服當隨寒熱加減  
但令背煖爲佳亦勿令出汗恐表虛風邪易傷乳哺亦不宜  
過飽陳氏所謂忍三分寒喫七分飽頻揉肚少洗澡要肚煖  
頭涼心胸涼皆至論也又須令乳母預慎六淫七情厚味炙  
博則乳汁清寧兒不致疾否則陰陽偏勝血氣沸騰乳汁敗  
壞必生諸病若屢用藥餌則臟腑陰損多變敗證可不慎歟  
大抵保嬰之法未病則調和乳母既病則審治嬰兒亦必兼

治其母爲善

小兒飲食有任意偏好者無不致病所謂爽口味多終作疾  
也極宜慎之嘗見王隱君曰余幼時酷嗜甘飴忽一日見飴  
中有蚯蚓伸頭而出自此不敢食飴至長始知長上爲之此  
可爲節戒之妙法

初生兒看病法

四

初生兒以手捻其頭摸其頤頷不作聲者爲無病總有病以手  
指探其口雖發聲而從容嘔指者其病輕若卽發聲不嘔指  
而色或青紅兼紫者此落地受寒之甚也其病重須急辨其  
形色虛實而治之若牙關緊閉不納乳或硬而不軟其病極



重也。此驚邪入足太陽經及足陽明經而然。須急治之。庶可平復。

一初生兒肥胖色嫩日覺好看者此其根本不堅甚非佳兆且亦最易感邪凡邪入腑者近在第二三日見之其證吐乳夜啼發哭腹鳴皆胎驚之證然猶淺而易治○若邪之入臟者遠在六七日見之此臍風噤風噤口風之候其病深而難醫若大聲口噤舌大痰壅者不治蓋五六日間病傳心肺脾三經也此風氣甚盛而無所洩故形見於喉口牙關聲音也○其面額青紫黑色者不治爪甲青黑者不治臍青黑者亦不

治○凡父母肥者不可生肥兒父母瘦者亦不可生肥兒生而肥胖必當以藥斂之使其肥肉堅實面轉微黃之色則吉不然則凶○生兒怯弱必須以藥扶助之若七日之內肌肉頓肥則必病矣過此以往漸肥者不足慮也治肥之法宜清痰濕解胎毒預防其風氣亦不可過用峻厲以傷脾氣○又當看小兒元氣厚薄厚者十無一失薄者十無一生然其中有死者有不死者則以病之所生有真偽也凡怯弱者宜專培脾腎為主

看小兒壽夭法

五

看病法

六



看小兒法以聽聲爲先察色爲次凡聲音清亮者生有回音者  
生澁者病散而無出聲者不壽○忽然大聲而無病者須細  
看其身恐有瘡毒卽須治之○臍帶中無血者生臍帶銀白  
色者生短帶紫脹者於斷帶之後捻去紫血可保無虞○額  
皮寬者壽○邪縫通達黑色者壽初生下如水泡之狀者險  
○面轉微黃之色者吉○生下粉白花色者必主臍風而石  
○生下皮寬肉瘦五六日頓肥者亦必有臍風之患○生下  
皮肉不光者死○泣不出聲者死○泣而無淚者死○舌如  
猪肝者死○口角上有紫色如蝦鬚者死○髮粗長者生細  
軟不放者死○陰物不起者死○陰囊不收者死白者死赤  
者死○無糞門者死○臀肉不生者死○股肉不生者不壽  
○面無彩色者天○臍帶短大紫色者天○生下渾銀白  
色者天○生下有齒者大凶致傷父母不然必傷自身○生  
下未褻卽撒尿者殺父母蕩家財在世一生勞苦

脉法 六

凡小兒形體旣具經脈已全所以初脫胞胎便有脉息可辨故  
通評虛實論曰乳子病熱脉懸小者手足溫則生寒則死乳  
子病風熱喘鳴肩息者脉實大也緩則生急則死此軒岐之



診小兒未嘗不重在脉亦未嘗不兼證爲言也自水鏡訣及  
全幼心鑑等書乃有三歲以上當察虎口寅卯辰風氣命三  
關之說其中之可取者惟曰脉從寅關起不至卯關者易治  
若連卯關者難治若寅侵卯卯侵過辰者十不救一只此數  
語乃於危急之際亦可用辨吉凶至若紫爲風紅爲傷寒青  
爲驚白爲疳及青是四足驚赤是水驚黑是人驚黃是雷驚  
之類豈此一線之色果能辨悉如此最屬無稽烏足憑也卽  
今幼科所尙無不以此爲科套全不知脉而信口胡猜試問  
其心果亦有的確之見否茫然無據而欲以人子爲嘗試良

可嘆也故凡診小兒旣其言語不通尤當以脉爲主而參以  
形色聲音則萬無一失矣然小兒之脉非比大人之多端但  
察其強弱緩急四者之脉是卽小兒之肯綮蓋強弱可以見  
虛實緩急可以見邪正四者旣明則無論諸證但隨其病以  
合其脉而參此四者之因則左右逢源所遇皆道矣再加以  
聲色之辨更自的確無疑又何遁情之有此最活最妙之心  
法也若單以一脉鑿言一病則一病亦能兼諸脉其中真假  
疑似未免膠柱實有難於確據者然法不可廢最所當察故  
擇其得理者并附於左亦可以見其槩



錢仲陽曰小兒之脈氣不和則絃急傷食則沉緩虛驚則促急風則浮冷則沉細脈亂者不治

薛氏曰凡看脈先定浮沉遲數陰陽冷熱沉遲爲陰浮數爲陽浮主風沉遲主虛冷實主有熱緊主癲癇洪主熱盛沉緩主虛瀉微遲有積有蟲遲瀼主胃腕不和沉主乳食難化沉細主乳食停滯緊絃主腹中熱痛牢實主大便秘沉而數者骨中有熱絃長是肝膈有風緊數乃驚風爲患四肢掣顫浮洪乃胃口有熱沉緊主腹痛有寒虛濡者有氣又主慢驚菀主

大便利血

聲音七

聲由氣發氣實則聲壯氣虛則聲怯故欲察氣之虛實者莫先乎聲音如內經諸篇有曰言而微終日乃復言者此奪氣也○有曰氣海有餘者氣滿胸中悅息面赤氣海不足則氣少不足以言○有曰心氣虛則悲實則笑不休○有曰手少陰虛則不能言○有曰內奪而厥則爲瘖俳此腎虛也○華元化曰陽候多語陰證無聲多語者易治無聲者難榮○凡此皆聲音虛實之辨故彼聖人者聞聲知情無所不達此聲音之學所以不可忽也



全書卷四十一  
小兒上  
顏色 八

脉要精微論曰夫精明五色者氣之華也赤欲如白裏朱不欲如赭白欲如鶩羽不欲如鹽青欲如蒼壁之澤不欲如藍黃欲如羅裏雄黃不欲如黃土黑欲如重漆色不欲如地蒼五色精微象見矣其壽不久也

玉版論要篇曰色夭面脫不治百日盡已色見上下左右各在其要上爲逆下爲從女子右爲逆左爲從男子左爲逆右爲從

五色篇曰官五色奈何曰青黑爲痛黃赤爲熱白爲寒是謂五官○又曰以色言病之間甚奈何曰其色麗以明沉夭者爲甚其色上行者病益甚其色下行如雲徹散者病方已

經脉篇曰凡診絡脉脉色青則寒且痛赤則有熱胃中寒手魚之絡多青矣胃中有熱魚際絡赤其暴黑者留久痺也其有赤有黑有青者寒熱氣也其青短者少氣也

凡察色之法大都青白者少熱氣病主陰邪黃赤者多熱氣病主陽盛○青主風氣主肝邪主脾胃虛寒主心腹疼痛主暴驚傷心膽之氣主驚風當察兼色以分急慢○白主氣虛甚則氣脫主無火主脾肺不足白兼青者主慢驚主大小腸泄



瀉○赤主火主痰熱主傷寒熱證主煩渴主急驚躁擾主閉  
結主陽邪喘促主癰瘍痘疹○黑屬水主陰寒主厥逆主痛  
極沉黑主危篤○黃主積聚主痞塊主脾病主脹滿主脾疝  
黃兼白者主脾寒脾弱主氣虛神怯黃兼青者主脾虛泄瀉  
主慢脾風黃兼赤者主疔熱○兩顴鮮紅或作或止者謂之  
面戴陽乃真陰虛弱此非陽證也不得以熱赤同論

錢氏曰左頰爲肝右頰爲肺額上爲心鼻上爲脾下頰爲腎隨  
證施治之

藥餌之誤九

小兒氣血未克而一生盛衰之基全在幼時此飲食之宜調而  
藥餌尤當慎也今舉世幼科既不知此大本又無的確明見  
而惟苟完目前故凡遇一病則無論虛實寒熱但用海底甕  
法而悉以散風消食清痰降火行滯利水之劑總不出二十  
餘味一套混用謬稱穩當何其誕也夫有是病而用是藥則  
病受之矣無是病而用是藥則元氣受之矣小兒元氣幾何  
能無陰受其損而變生不測耶此當今幼科之大病而醫之  
不可輕任者正以此也又見有愛子者因其清黃瘦弱每以  
爲慮而詢之庸流則不云痰火必云食積動以肥兒丸保和



全書卷四十一  
丸之類使之常服不知肥兒丸以苦寒之品最敗元陽保和丸以消耗之物極損胃氣謂其肥兒也而適足以瘦兒謂其保和也而適足以違和耳卽如抱龍丸之類亦不宜輕易屢用余嘗見一富翁之子每多痰氣或時驚叫凡遇疾作輒用此丸一投卽愈彼時以爲神丹如此者不啻十餘次及其長也則一無所知凝然一癡物而已豈非暗損元神所致耶凡此尅伐之劑所以最當慎用故必有真正火證疳熱乃宜肥兒丸及寒涼等劑真正食積脹滿乃宜保和丸及消導等劑真正痰火喘急乃宜抱龍丸及化痰等劑卽用此者亦不過中病卽止非可過也若無此實邪可據而諸見出入之病則多由虧損元氣悉當加意培補方是保赤之主倘不知此而徒以肥兒保和等名乃欲藉爲保障不知小兒之元氣無多病已傷之而醫復伐之其有不萎敗者鮮矣此外如大黃芒硝黑丑芫花大戟三稜蓬朮之類若非不得已皆不可輕易投也

小兒診治大法 十

凡小兒之病本不易察但其爲病之源多有所因故凡臨證者必須察父母先天之氣而母氣爲尤切如母多火者子必有



火病母多寒者子必有寒病母之脾腎不足者子亦如之凡  
骨軟行遲齒遲語遲顛門開大疳熱脾泄之類多有由於母  
氣者雖父母之氣俱有所稟但母氣之應在近父氣之應在  
遠或以一強一弱而偏得一人之氣者是皆不可不察至若  
稍長而縱口縱欲或調攝失宜而自爲病者此又當察其所  
由辨而治之如果先天不足而培以後天亦可致壽雖曰先  
天俱盛而或父母多慾或撫養失宜則病變百端雖強亦天  
此中幾圓理微貴在知常知變也

撮口臍風 十一

初生小兒撮口臍風者因胎中受熱或初生不慎爲風寒所侵  
遂致聚唇撮口眼閉口噤啼聲如雅或聲不能出或舌上如  
粟或口吐白沫或喉痰潮響或氣息喘急甚者舌強面青腹  
脹青筋吊腸牽痛百日內病甚者多不治○臍風者以斷臍  
之後爲水濕風邪所侵因致腹脹臍腫四肢柔直啼不吮乳  
甚則發搐若臍邊青黑手拳口噤者是爲內搐不可治○凡  
治此之法痰盛者當先治痰火盛者當先清火若無火無痰  
者專當溫補脾胃○凡斷臍不盈尺多患此者齒齦有泡如  
粟以綿裹指蘸溫水擦破口卽開不用藥七日內患此者百



無一生○臍風果因浴拭外傷皮膚者用綿灰或枯礬末搽之即愈○若因剪臍短少或因束縛不緊或因牽動風入臍中或因鐵器斷臍冷氣傳於脾絡以致前證者口內有小泡急掐破去其毒水以艾炙臍中亦有得生者治法多端無如灸法○若因乳母肝脾鬱怒或飲食生冷辛熱致兒為患者當治其母

錢氏云撮口因浴後拭臍風邪所入而作用益黃散補之  
陳無擇云視其牙齦有泡搽破之口既開用真白殭蚕略烘為末蜜調塗口內

保嬰集云小兒百日臍風馬牙當作胎毒瀉足陽明之火用鍼挑破以桑樹白汁塗之

田氏治噤風用天南星為末加片腦少許以指蘸薑汁擦牙齦立開○或用牛黃以竹瀝調服一字隨以猪乳滴於口中

驚風 十二

驚風之要領有二一曰實證一曰虛證而盡之矣蓋急驚者陽證也實證也乃肝邪有餘而風生熱熱生痰痰熱客於心膈間則風火相搏故其形證急暴而痰火壯熱者是為急驚此當先治其標後治其本慢驚者陰證也虛證也此脾肺俱虛



肝邪無制因而侮脾生風無陽之證也故其形氣病氣俱不足者是爲慢驚此當專顧脾腎以救元氣雖二者俱名驚風而虛實之有不同所以急慢之名亦異凡治此者不可不顧其名以思其義

論驚風證治 十三

小兒驚風肝病也亦脾腎心肺病也蓋小兒之真陰未足柔不濟剛故肝邪易動肝邪動則木能生火火能生風風熱相搏則血虛血虛則筋急筋急則爲掉眩反張搐搦強直之類皆肝木之本病也至其相移木邪侮土則脾病而爲痰爲吐瀉

木盛金衰則肺病而爲喘促爲短氣木火上炎則心病而爲驚叫爲煩熱木火傷陰則腎病而爲水涸爲血燥爲乾渴爲汗不出爲搐爲瘥此五臟驚風之大槩也治此之法有要存焉蓋一曰風二曰火三曰痰四曰陽虛五曰陰虛但能察此緩急則盡之矣所謂風者以其強直掉眩皆屬肝木風木同氣故云驚風而實非外感之證今人不明此義但爲治風必須用散不知外來之風可散而血燥之風不可散也故凡如防風荆芥羌活獨活細辛乾葛柴胡紫蘇薄荷之類使果有外邪發熱無汗等證乃可暫用如無外邪則最所當忌此用



散之不可不慎也。所謂痰火者，痰凝則氣閉，火盛則陰虧。此實邪之病本也。若痰因火動，則治火為先，火以痰留，則去痰為主。火之甚者，宜龍膽草、山梔子、黃連、黃柏、石膏、大黃之屬。火之微者，宜黃芩、知母、玄參、石斛、地骨皮、木通、天麻之屬。痰之微者，宜牛黃、膽星、天竺黃、南星、半夏、白芥子之屬。痰之微者，宜陳皮、前胡、海石、貝母、天花粉之屬。此外如硃砂之色赤，體重，故能入心鎮驚；內孕水銀，故善透經絡墜痰降火；雄黃之氣味雄悍，故能破結開滯；直達橫行，冰片射香，乃開竅之要藥；琥珀青黛亦清利之佐助而已。又如蠶、全蠍、蟬、蛻之

屬，皆云治風在疆。蠶味鹹而辛，大能開痰涎，破結氣，用佐痰藥，善去肝脾之邪。邪去則肝平，是即治風之謂也。全蠍生於東北，色青屬木，故善走厥陰，加以鹽味鹹而降痰，是亦同氣之屬。故云治風較之疆蠶，此其次矣。蟬、蛻性味俱薄，不過取其清虛輕銳之義，非有實濟不足恃也。凡驚風之實邪，惟痰火為最，而風則次之。治實之法，止於是矣。然邪實者易制，主敗者必危。蓋陽虛則陰邪不散，而元氣不復；陰虛則營氣不行，而精血何來。所以驚風之重，重在虛證，不虛不重，不竭不危。此元精元氣相為並立，有不容偏置者也。故治虛之法，當



辨陰陽陽虛者宜燥宜剛陰虛者宜溫宜潤然善用陽者氣中自有水善用陰者水中自有氣造化相須之妙既有不可混又有不可離者如此設有謂此非小兒之藥此非驚風之藥者豈驚風之病不屬陰陽而小兒之體不由血氣乎若夫人者開口便可見心又烏足與論乾坤合一之道諸補之法具詳如左

一驚風反張強直轉筋等病在經筋篇曰足少陰之筋病足下轉筋及所過而結者皆痛病在此者主癰瘰及瘰在外者不能俛在內者不能仰故陽病者腰反折不能俛陰病者不能仰○又曰經筋之病寒則反折筋急熱則筋弛縱不收陰痿不用陽急則反折陰急則俛不伸

急驚風 十四

急驚之候壯熱痰壅竄視反張搐搦顛動牙關緊急口中氣熱頰赤唇紅飲冷便結脈浮洪數此肝邪風熱陽盛陰虛證也治此之法當察緩急凡邪盛者不得不先治其標○若痰甚喘急者宜抱龍丸琥珀散清膈煎梅花飲之類主之○火盛而煩熱者宜涼驚丸抑青丸或黃連安神丸牛黃散及山梔黃連龍膽草之屬○火盛燥熱而大便秘結者宜瀉青丸或



以爲湯煎服之。或利驚丸亦可。○若外感風寒，身熱爲驚者，當解其表，宜抑肝散，倍加柴胡，或參蘇飲，五積散，星蘇散之類，擇而用之。○若表邪未解，而內亦熱者，宜錢氏黃龍湯。○若驚氣漸退，而火未清者，宜安神鎮驚丸。○凡以上者，皆急則治標之法，但得痰火稍退，卽當調補血氣，如後附薛氏之法，或參用慢驚諸治，以防虛敗。此幼科最要之法。前哲有云：小兒易爲虛實，攻伐之藥，中病卽止，不可過劑，誠至言也。○大抵此證多屬肝膽脾腎陰虛血燥，風火相搏而然。若不顧真陰，過用祛風化痰之藥，則脾益虛，血益燥，邪氣綿延，必成慢驚矣。此中陰虛之義，皆人所不知。當閱小兒補腎論，始見其詳論，載第二卷二五。

東垣曰：急驚者，風木旺也。風木屬肝，肝邪盛必傳尅於脾。欲治其肝，當先實脾，後瀉風木。

婁全善曰：急驚屬木火土實。木實則搐而有力，及目上視動，劄頻睫，土實則身熱面赤而不吐瀉，偃睡合睛。治法宜涼宜瀉，而用涼驚利驚等丸。亦有因驚而發者，以致牙關緊急，壯熱等證。此內有實熱外挾風邪，當截風定搐。若痰熱尙盛，宜微下之。痰熱旣泄，急宜調養胃氣，搖定而痰熱少退，卽宜調補。



脾氣

薛氏曰此肝經血虛火動生風蓋風生則陰血愈散陰火愈熾火動則肺金愈虧肝邪愈盛宜滋肝血養脾氣若屢服祛風化痰瀉火辛散之劑便宜認作脾虛血損急補脾土○若風火相搏發熱抽搐目瞶筋攣痰盛者用四物鈞藤鈎以生肝血清肝火用四君子加當歸以補脾土生肺金○若肝經血燥發熱驚搐目瞶筋攣痰盛者用六味丸以滋腎水四君子加芍藥以補脾土○若肺金剋肝木用地黃丸以益肝血加芍藥木香以平肺金○若屢用驚藥而脾胃虛寒者須用六君子湯以補脾土丁香木香以培陽氣○若脾土虛寒腎水反來侮土而致中寒腹痛吐瀉少食等證者用益黃散以補脾土而瀉水庶幾不致慢驚矣○但治小兒當審察虛實凡證屬有餘者病氣也不足者元氣也故有餘當認爲不足思患預防斯少矣

慢驚風

十五

慢驚之候多由吐瀉因致氣微神緩昏睡露睛痰鳴氣促驚跳搐搦或乍發乍靜或身涼身熱或肢體逆冷或眉唇青赤面色淡白但其脈遲緩或見細數此脾虛生風無陽證也○小



兒慢驚之病多因病後或以吐瀉或因誤用藥餌損傷脾胃所致然亦有小兒脾胃素弱或受風寒則不必病後及誤藥者亦有之總屬脾腎虛寒之證○治慢驚之法但當速培元氣卽有風痰之類皆非實邪不得妄行消散再傷陽氣則必致不救○凡脾土微虛微瀉而內不寒者可平補之宜六神散四君子湯或五味異功散○脾腎俱虛而臟平無寒者宜五福飲且陰血生於脾土又宜四君子加當歸棗仁○脾氣陽虛微寒者宜溫胃飲理中湯五君子煎○脾氣虛寒多痰者宜六君子湯或金水六君煎○脾腎陰陽俱虛而寒者惟

理陰煎爲最妙○脾腎虛寒之甚或吐瀉不止者宜附子理陰煎再甚者宜六味回陽飲或四味回陽飲量兒大小與之○脾腎虛寒泄瀉不止者宜胃關煎

薛氏曰保嬰集云急驚屢發屢用攻瀉則脾損陰消而變爲慢驚者多矣當補脾養血佐以安心清肺制木之藥最爲切當竊謂前證多因脾胃虧損肝木所勝外虛熱而內真寒也但用五味異功散加當歸佐以釣藤飲以補脾土平肝木亦多得效如不應六君加炮薑木香溫補脾土更不應急加附子以回陽若用逐風驅痰之藥反促其危也○愚按附子溫



中回陽爲慢驚之聖藥也。如元氣未脫用之無有不效。氣脫甚者急宜炮用之。

保嬰撮要曰：凡元氣虧損而至昏憤者，急灸百會穴。若待下痰不愈而後灸之，則元氣脫散而不救矣。此乃臟腑傳變已極，總歸虛處，惟脾受之，無風可逐，無驚可療。因脾虛不能攝涎，故津液妄泛而似痰者，但當以溫補脾胃爲主。若不審其因，泛用祛風化痰之劑，則脾氣益傷，陰血益損，病邪益甚而危矣。

張全善曰：木虛則摘而無力，火虛則身寒，口中氣冷，土虛則吐瀉，睡而露睛，治宜溫補脾胃。用六君子湯，五味異功散之類。

大驚卒恐 十六

小兒忽被大驚，最傷心膽之氣。口問篇曰：大驚卒恐，則氣血分離，陰陽破散，經絡厥絕，脈道不通，陰陽相逆，經脈空虛，血氣不次，乃失其常。此內經槩言受驚之病有如此矧。小兒血氣尤非大人之比。若受大驚，則其神氣失散，潰亂不堪，尙何實邪之有斯時也。收復正氣，猶恐不暇，顧可復爲清散耶。卽如硃砂琥珀之類，不過取其鎮重之意，亦非救本之法。今幼科諸書皆以大驚之證，例作急驚論治，誤亦甚矣。不知急驚慢



驚一以風熱一以脾腎之虛皆不必由驚而得而此以驚恐致困者本心膽受傷神氣陟離之病所因不同所病亦異胡可以同日語也

治大驚氣散之病當以收復神氣為主宜秘旨安神丸七福飲茯神湯團參散獨參湯之類加金銀等物煎服之

驚啼 十七

小兒驚啼證本與驚風不同亦與大驚卒恐者有異蓋小兒肝氣未充膽氣最怯凡耳聞驟聲目視驟色雖非大驚卒恐亦能怖其神魂醒時受怖寐則驚惕或振動不寧或忽爾啼叫

皆神怯不安之證總宜安神養氣為主如獨參湯團參散七福飲秘旨安神丸之類皆其所宜○若微煩熱者宜生脈散熱甚者宜硃砂安神丸或導赤散○驚哭多淚忽啼忽止者是驚惕啼叫無淚聲長不揚者是腹痛

發搐 十八

搐抽搐也是即驚風之屬但暴而甚者謂之驚風微而緩者謂之發搐發搐不治則漸成驚風矣雖錢氏等書皆以時候之氣分五臟之證為論治然病變不測有難以時氣拘者是不若察見在之形證因臟腑之虛實隨宜施治者之為得也總



之小兒之實證無他惟東方之實及中央之滯耳蓋東方木實則生火生風而爲熱爲驚中央土實則生濕生滯而爲痰爲積知斯二者則知所以治實矣○若小兒之虛證則五臟皆有之如心虛則驚惕不安肺虛則氣促多汗脾虛則爲嘔吐爲暴泄爲不食爲痞滿倦臥爲牙緊流涎爲手足牽動肝虛則爲筋急血燥爲抽搐勁強爲斜視目瞪腎虛則爲二便不禁爲津液枯槁爲聲不出爲戴眼爲肢體厥逆爲火不歸源知此五者則知所以治虛矣○然此虛實之證固亦多有疑似者但以形色聲音脉息參而察之則無有不燦然者

治實之法當從急驚治虛之法當從慢驚及如後夜啼諸治法已盡其蘊當并察之總之諸言實者乃邪氣之實非元氣之實也故治此者切不可傷及元氣若病已久尤當專顧脾腎則根本完固諸無不愈矣

錢仲陽曰驚癇發搐男左視無聲右視有聲女右視無聲左視有聲此相勝也蓋左爲肝部右爲肺部金木相勝故耳○若握拳拇指在內女爲順拇指在外男爲順順則易治逆則難治

薛氏曰寅卯辰時搐而發熱作渴飲冷便結屬肝膽經虛熱用



柴芍參苓散作渴引飲自汗盜汗屬肝胆經血虛用地黃丸  
口吻流涎屬肝木尅脾土用六君子湯○巳午未時發搐若  
兼作渴飲水屬風火相搏以地黃丸補肝導赤散涼驚丸治  
心若作渴飲湯體倦不乳土虛而木旺也用地黃丸以補腎  
六君子湯以補脾○申酉戌時微搐而喘目微斜身似熱睡  
而露睛大便淡黃屬脾肺虛熱用異功散若手足逆冷或喘  
瀉不食屬脾肺虛寒用六君炮薑木香久病而元氣虛者用  
六君子六味丸二藥主之○亥子丑時微搐身熱目睛紫斜  
吐瀉不乳厥冷多睡屬寒水侮土用益黃散未應用六君薑

桂○傷風發搐口中氣熱呵欠手足動者名假搐用大青膏  
發散風邪○傷風發搐口氣不熱肢體倦怠用異功散補脾  
土釣藤飲清肝木○若因風邪內鬱發熱而變諸證者當理  
肺金清風邪○若外邪既解而內證未除當理肺補脾○若  
停食發搐嘔吐乳食者宜用消食丸○若傷食後發搐身熱  
困睡嘔吐不思乳食者當先定搐後用白餅子下之○若食  
既散而前證仍作或變他證者脾土傷而肝木乘之也用六  
君子加釣藤釣以健脾平肝○若肺經虧損而致驚搐等證  
者當補脾肺以平肝心則驚搐自止矣○如手足冷汗搐者



搐肚日夜不止名真搐當用人參湯川烏全蝎等藥平其胃氣○百日內發搐真者內生風二三次必死假者外生風雖頻發不死○百日內搐亦有因乳母七情厚味所致者當兼治其母而以固胃爲先不可逕治其兒也○若涎入心脾則不能言用涼心鎮驚下痰之藥逆搐者不治○若吐瀉後變證者亦不治○大凡發搐因風者則面青目赤因驚則叫呼搐搦因食則嘔吐氣悶脾肺虛則生粘痰喉間作鋸聲此乃心火不能生脾土脾土不能生肺金以致肺不能主氣脾不能攝涎故涎氣泛上而喉中作聲耳若用祛風治痰之劑則氣散陰消而促其危矣

夜啼 十九

小兒夜啼不安按保嬰等書云夜啼有二曰脾寒曰心熱也夜屬陰陰勝則脾臟之寒愈盛脾爲至陰喜溫而惡寒寒則腹中作痛故曲腰而啼其候面青手腹俱冷不思乳食是也亦曰胎寒宜釣藤飲寒甚者埋中丸○若曲腰啼叫哭而無淚者多係腹痛宜木香散或用溫胃飲加木香○若脾腎寒甚而兼帶作痛者宜陳氏十二味異功散○若過用乳食停滯作痛邪實無虛而啼者宜保和丸和胃飲加減主之甚者宜



消食丸○若陰盛陽衰心氣不足至夜則神不安而啼叫者宜四君子湯五味異功散或七福飲秘旨安神丸○若面青手冷陽氣虛寒心神驚怯而啼者宜五君子煎或六味異功煎甚者宜七福飲加炮乾薑肉桂○若兼泄瀉不乳脾腎虛弱也宜六神散甚者養中煎胃關煎○若兼吐瀉少食脾胃虛寒也宜五君子煎溫胃飲或六味異功煎加炮木香○若大便不化食少腹脹胆氣虛弱也宜五味異功散或五君子煎加木香○若面色白黑睛少至夜分陰中陽虛而啼者此肝腎之不足也宜六味丸八味丸理陰煎○若見燈見火

愈啼者心熱也心屬火見火則煩熱内生兩陽相搏故仰身而啼其證面赤手腹俱煖口中氣熱是也火之微者宜生脈散導赤散火之甚者宜硃砂安神丸人參黃連散○若肝胆熱甚木火相搏者宜柴胡清肝散○大都此證或因吐瀉內亾津液或稟賦腎陰不足不能滋養肝木或乳母恚怒肝火侮金當用六君子湯補脾土以生肺金地黃丸壯腎水以滋肝木若乳母鬱悶而致者用加味歸脾湯乳母暴怒者加味小柴胡湯乳母心肝熱搏者柴胡清肝散○若因驚夜啼者宜從前驚啼論治



小兒發熱證其最要者有四一則外感發熱二則瘡毒發熱三則痘疹發熱四則疳積發熱凡此四者之外如飲食驚風陰虛變蒸之類雖亦有之然各有其說均當詳辨

一發熱當辨虛實如實則面赤氣粗口燥唇瘡作渴喜冷飲水大小便難或掀衣露體煩啼暴叫聲洪脈強伸體而臥睡不露睛手足指熱皆爲實證實以邪氣有餘或可散邪或宜清火○虛則面色青白氣怯神倦恍惚軟弱口鼻微冷不喜寒涼飲湯安靜泄瀉多尿嘔惡驚惕上盛下泄抱胞喜按乍涼

乍溫夜則虛汗臥則露睛屈體而臥手足指冷脈息緩弱皆爲虛證虛以正氣不足最宜調補或兼解邪雖有發熱外證必不可妄用寒涼及任意消散尅伐等劑

外感發熱治法 二十一

凡小兒無故發熱多由外感風寒若寒邪在表未解者必有發熱頭痛或身痛無汗或鼻塞流涕畏寒拘急脈見緊數者是也○凡暴感者極易解散一汗可愈但察其氣血平和別無實熱等證或但倦怠昏睡者則但以四柴胡飲或五柴胡飲爲主酌兒大小而增減其劑此法先固其中次解其表庶元



氣無傷而邪且易散最爲穩當極妙之法有云小兒何虛乃  
堪此補及又有補住邪氣之說皆寸光昧理之談不可信也  
○若胃氣微見虛寒者宜五君子煎加柴胡或以理陰煎加  
減用之最妙○元氣頗強而能食者宜正柴胡飲○兼內熱  
火盛而外邪未解者宜一柴胡飲或錢氏黃龍湯○壯熱火  
盛往來寒熱者宜柴芩煎○寒氣盛者宜二柴胡飲○寒邪  
盛而中氣微虛者宜五積散○傷寒見風身熱兼嗽而中氣  
不虛者宜柴陳煎若中氣不足而兼熱兼嗽者宜金水六君  
煎○冬受寒邪至春夏而發熱者是爲小兒正傷寒但取效  
稍遲然治法不能外此

新按 余之仲兒生於乙卯五月於本年初秋忽爾感寒發熱  
脈微緊然素知其臟氣屬陰不敢清解遂與芎蘇羌芷細辛  
生薑之屬冀散其寒一劑下咽不惟熱不退而反大瀉作連  
二日瀉不止而喘繼之愈瀉則愈喘斯時也將謂其寒氣盛  
耶何以用溫藥而反瀉將謂其火刑金耶豈以清瀉連日而  
尙堪寒涼將謂其表邪之未除耶則何以不利於蘇散束手  
無策疑懼已甚且見其表裏俱劇大喘垂危又豈淺易之劑  
所能挽回因沉思良久漸有所得乃用人參二錢生薑五片



煎汁半盞然未敢驟進恐再加喘必致不救因用茶匙挑與  
 二三匙即懷之而旋走室中徐察其呼吸之進退然喘雖未  
 減而亦不見其增甚乃又與三四匙少頃則覺其鼻息似乎  
 少舒遂放胆與以半小鍾更覺有應自午及酉完此一劑適  
 一醫至急呼曰誤矣誤矣焉有大喘如此而尚可用參者速  
 宜以抱龍丸解之余諾之而不聽乃復以人參二錢五分如  
 前煎湯自酉至子盡其劑劑完而氣息遂平胸膈大睡瀉亦  
 止而熱亦退矣此所以知其然者觀其因瀉反喘豈非中虛  
 設有實邪自當喘隨瀉減是可辨也向使誤聽彼醫易以清

利中氣一脫即當置之死地必仍咎余之誤用參也就是孰  
 非何從辨哉余因紀此以見溫中散寒之功其妙有如此者

外感發熱弗藥可愈 二十二

〇〇〇

凡小兒偶然發熱者率由寒熱不調衣被單薄柔弱肌腠最易  
 相感感則熱矣余之治此不必用藥但於其熟睡之頃夏以  
 單被冬以綿被蒙頭鬆蓋勿壅其鼻但以稍煖為度使其鼻  
 息出入皆此煖氣少頃則微汗津津務令上上稍透則表裏  
 通達而熱自退矣若冬月衣被寒涼汗不易出則輕樓着身  
 赤體相貼而上覆其面則無有不汗出者此余近年養兒至



妙之法百發百中者也。若寒邪甚者，兩三微汗之，無有不愈。然此法惟行於寅卯之際，則汗易出而效尤速。

諸熱辨證 二十三

一、小兒發熱，若熱隨汗退者，卽外感證也。○其有取汗至再而熱不退者，必癰毒痘疹之候，俟其形見，當於本門求法治之。○若是瘡毒，但當辨其陰證陽證。陽證宜清火解毒，陰證宜托裏助陽。方治詳具外科。○若汗出熱不退，別無癰腫而耳後紅筋燦然，及眼如包淚，或手指尖冷，脈緊數者，必是痘疹。方治詳具痘疹門。

一、小兒飲食內傷，本無發熱之證。蓋飲食傷臟，則爲脹爲痛，爲吐爲瀉，本非肌表之病焉。得發熱，故調經論曰：邪之生於陽者，得之風雨寒暑，生於陰者，得之飲食居處陰陽喜怒。此自不易之理也。今人但見小兒發熱，則多言傷食而妄行消導，謬亦甚矣。○其或飲食內傷，風寒外感，表裏兼病而發熱者，亦常有之。然此常察其食之有停無停，酌而治之，亦非可混行消耗。蓋恐內本無滯，而妄加剋伐，則虧損中氣，以致外邪難解，則病必滋甚。

一、小兒疳積發熱，此誠飲食內傷所致。然必成疔成疰，陽明鬱



積既久所以內外俱熱是非暴傷飲食者之比亦非肌表發熱者之比方治詳具疳積條

一 小兒有陰虛發熱之證及變蒸發熱之說凡陰虛發熱者此即小兒勞損證也亦名爲童子勞此當於虛損門求法治之○至若變蒸之說則辨在本條并當詳察

錢仲陽曰潮熱者時間發熱過時即退來日依時而發此欲發驚也○壯熱者常熱不已甚則發驚癇也○風熱者身熱而口中氣熱乃風邪外感也○溫熱者肢體微熱熱不已則發驚搖○壯熱惡風寒爲元氣不充表之虛熱也○壯熱不惡

風寒爲外邪所客衣之實熱也○壯熱飲湯爲津液短少裏之虛熱也○壯熱飲水爲內火銷燬裏之實熱也○脉尺寸俱滿爲重實○尺寸俱弱爲重虛○脉洪大或緩而滑或數而鼓此熱盛拒陰雖形證似寒實非寒也○熱而脉數按之不鼓此寒盛格陽雖形證似熱實非熱也○發熱惡熱大渴不止煩躁肌熱不欲近衣其脉洪大按之無力或兼目痛鼻乾者此血虛發熱也當補其血○如不能食而熱自汗出者氣虛也當補其氣

內熱證 二十四

見二熱證

三



內熱與外熱不同。內熱以五內之火熱由內生病在陰分。故內熱者宜清涼。不宜升散。升散則內火愈熾。火空則發也。外熱以膚腠之邪風寒外襲。病在陽分。故外熱者宜解散。不宜清降。清降則表熱愈留。外內合邪也。此外熱內熱之治。其不同者有如此。欲分內外之辨。則外熱者其至必驟。內熱者其來必緩。但察其絕無表證。而熱在臟腑。七竅三焦。二陰筋骨肌肉之間者。皆是內熱之證。但內熱之證。亦有虛實。實者宜從正治。虛者當從反治。反正之間。有冰炭之異。非可混也。

凡實熱之在內者。古法治分五臟。宜從正治。○心熱者宜瀉心

湯道赤散。安神丸。○肝熱者瀉青丸。柴胡飲子。龍胆湯。○脾

熱者瀉黃散。○肺熱者輕則瀉白散。地骨皮散。重則涼膈散。

○腎熱者滋腎丸。滋陰八味丸。實熱則宜疎下。虛熱則宜調

補。○肢體熱輕則惺惺散。重則人參羌活散。○大便秘者二

黃犀角散。四順清涼飲。○餘熱不退者地骨皮散。○大小便

血者保陰煎。○血熱妄行者清化飲。○三焦火盛上下熱甚

者抽薪飲。○小水熱痛者大分清飲。○陽明內熱煩渴頭痛

一便秘結者玉泉散。○陽明火盛兼少陰水虧者玉女煎。

凡元氣虛而為熱者。必真陰不足。皆假熱證也。宜從反治。○



心脾肺氣虛假熱者五君子煎人參理中湯○五臟氣血俱  
虛假熱者五福飲○肝腎真陰不足假熱者輕則六味地黃  
湯甚則理陰煎○肝腎血虛假熱者大營煎五物煎○肝腎  
陰虛上熱下寒則陽無所附而格陽為熱者六味回陽飲或  
八味地黃湯○肝經血虛生風而熱者四物加天麻鈞藤鈞  
○汗後血虛而熱甚者六神散加粳米○汗後氣虛而惡寒  
發熱者補中益氣湯○汗後陰虛陽無所附而熱者四物湯  
加參芪○汗後陽虛陰無所附而熱者四君子加芎歸○久  
從溫補而潮熱不退脈見滑大者五福飲加地骨皮或加知

母○凡嬰兒諸熱有因別證而作者當從所重者而治之○  
若乳下嬰兒當兼治其母以調之

小兒上論列方 二十五

四君子湯 補一

五君子煎 新熱六

五味異功散 補四

六君子湯 補五

團參散 小十

六味異功煎 新熱七

四物湯 補八

五物煎 新因三

金水六君煎 新和一

五福飲 新補六

理中湯 熱一

人參理中湯 熱一



七福飲 新補七

溫胃飲 新熱五

四味回陽飲 新熱一

胃關煎 新熱九

理陰煎 新熱三

六味回陽飲 新熱二

獨參湯 補三六

生脉散 補五七

六味地黃丸 補一二二

養中煎 新熱四

茯神湯 小六十

八味地黃丸 補一二二

大營煎 新補十四

滋腎丸 寒一六三

滋陰八味丸 新寒十七

保陰煎 新寒一

清化飲 新因十三

補中益氣湯 補三二

益黃散 和十九

六神散 小五一

加味歸脾湯 補三四

小柴胡湯 散十九

柴胡飲子 小三十

柴胡清肝散 寒五九

一柴胡飲 新散一

二柴胡飲 新散二

人參黃連散 小十七

四柴胡飲 新散四

五柴胡飲 新散五

二黃犀角散 小二九

正柴胡飲 新散六

柴芩煎 新散十

錢氏黃龍湯 小二五

柴陳煎 新散九

五積散 散三九

四順清涼飲 攻二五



星蘇散 小二四

參蘇飲 散三四

硃砂安神丸 寒一四二

惺惺散 小二三

釣藤飲 小六六

黃連安神丸 寒一四二

瀉白散 寒四二

瀉黃散 寒五七

秘旨安神丸 小七一

瀉心湯 寒二七

抑肝散 小六七

安神鎮驚丸 小七六

瀉青丸 寒一五一

抑青丸 小九八

東垣涼膈散 痘八三

抽薪飲 新寒三

龍膽湯 小八二

大分清飲 新寒五

王泉散 新寒十五

玉女煎 新寒十二

地骨皮散 小三一

導赤散 寒一二二

大青膏 小六八

消食丸 小三七

清膈煎 新寒九

和胃飲 新和五

利驚丸 小九七

涼驚丸 小九六

拖龍丸 小八五

琥珀散 小八一

牛黃散 小二七

梅花飲 小八三

白餅子 小三九

肥兒丸 小百十二

保和丸 小三五

木香散 痘二一



陳氏十二味異功散 痘二二二

人參羌活散 小二六

備用方

具列小兒方中所當詳閱

景岳全書卷之四十一終

景岳全書卷之四十一謨集

會稽 張介賓 會卿著

會稽 魯超 謙菴訂

# 小兒則下

吐瀉 二十六

小兒吐瀉證虛寒者居其八九實熱者十中一二但察其脈證無火面色清白氣息平緩肢體清涼或神氣疲倦則悉是虛寒之證不得妄用涼藥古人云脾虛則嘔胃虛則吐者是也



蓋飲食入胃不能運化而吐者此脾氣虛弱所以不能運也  
寒涼入胃惡心而吐者此中焦陽氣受傷所以不能化也若  
邪在中焦則止於嘔吐若連及下焦則并爲瀉矣故在中上  
二焦者宜治脾胃連及下焦者宜調脾腎若非實熱火邪而  
妄用寒涼消伐者無有不死

一 小兒虛寒嘔吐凡無故吐瀉察其無火者必生冷寒氣傷胃  
所致今小兒所病大約皆是此證宜養中煎或溫胃飲爲主  
治其次則五君子煎理中湯冬木煎○若兼血虛燥渴者宜  
五君子加當歸○若兼脾腎虛寒或多痰涎或兼喘促宜理

陰煎甚者人參附子理陰煎爲最妙勿謂嘔吐不宜熟地也

○若脾氣無寒或偶有所觸雖吐而不甚者宜五味異功散

○若脾中寒滯氣有不順而嘔吐者宜藿香安胃散○若上

焦不清多痰兼滯者宜六君子湯或更加砂仁炮薑木香

一 小兒傷食嘔吐若誤食不宜之物或停積滯濁以致吐者必  
胸膈脹滿或肚腹作痛此其中必有餘邪宜和胃飲益黃散  
○若但有食滯而胃不寒者宜大和中飲小和中飲○若食  
滯兼痰而吐者宜二陳湯六安煎苓朮二陳煎○若飲食雖  
滯而因脾虛不能運化者此其所重在脾氣不在飲食止宜



養中煎溫胃飲或理陰煎聖術煎之類以培其本不可因飲食之故而直行消伐也

一 小兒胃熱嘔吐者其證最少蓋內熱者多不致吐卽亦有之其必多食炙煇甘甜之物以致滯積胃口或夏間冒暑及臟氣素熱者乃有之凡治熱證必須詳辨的確勿得以假熱作真熱也○凡胃火內熱嘔吐者察其證必煩熱作渴喜冷察其脈息必洪大滑數火之甚者宜瀉黃散玉泉散或竹葉石膏湯○若有痰食之滯兼火作吐者宜二陳湯加石膏黃連山梔或加山查麥芽之類○若脾胃虛弱而兼火者宜人參

安胃散或橘皮竹茹湯○若胃火嘔吐作渴者宜竹茹湯○

若夏月胃熱陽暑傷胃者必煩熱大渴吐瀉並作宜五味香薷飲或十味香薷飲或竹茹湯或橘皮竹茹湯若內熱之甚者宜益元散玉泉散主之然暑有陰陽之辨若因天氣暑熱過用生冷以致傷胃而爲吐瀉者此屬陰暑則宜煖胃溫中如前虛寒治法或用五苓散亦妙凡本條之藥絕不可用

薛氏曰凡暑令吐瀉手足發熱作渴飲冷者屬陽證宜清涼之劑若手足並冷作渴飲湯者屬陰證宜溫補之劑故病有屬陰者誤用寒涼之藥死後手足青黯甚則遍身皆然於此可



驗

一小兒吐瀉并作者本屬內傷然有因寒氣自外而入內犯臟  
氣而然者有因生冷不慎致傷胃氣而然者有因中氣本弱  
飲食失宜而然者邪傷陽分則爲吐邪傷陰分則爲瀉若吐  
瀉並作則陰陽俱傷之證也此當察其有滯無滯詳辨其虛  
實而治之○若吐瀉初起邪滯未清者必有胸腹脹悶實滯  
等證此宜先用和胃飲苓朮二陳煎之類以清上焦之氣○  
若吐瀉初起腹脹腹痛而拒按者宜先用胃苓湯或五苓散  
加乾薑木香之類以分下焦之清○若上無脹滯或所吐既

多而嘔惡不已此其上焦豈尙有物但察其形氣困倦總惟  
胃虛而然若虛寒不甚者宜五味異功散然無寒不作吐故  
惟五君子煎六味異功煎及養中煎溫胃飲之類皆最宜也  
○若下腹雖痛而可按可揉或腹寒喜熨或所瀉既多而泄  
仍不止此其下焦必空虛已極惟脾腎虛寒不能固攝而然  
非胃關煎不可其稍輕者或用四君子加肉豆蔻補骨脂丁  
香之屬若虛中兼滯者或助胃膏亦可酌用○其或果由胃  
火則火逆於上熱蓄於下亦能爲吐爲瀉然必有火證火脉  
者方是其證乃宜大小分清飲或用香連丸或如前胃熱嘔



吐條參而治之然此證最少不得輕易混用

吐瀉新按

余季子於丁巳正月生於燕邸及白露時甫及半週余見新涼日至虞裊褥之薄恐爲寒氣所侵每切囑眷屬保護之而眷屬不以爲意及數日後果至吐瀉大作余卽用溫胃和脾之藥不效隨用理中等劑亦不效三日後加入人參三錢及薑桂吳茱肉豆蔻之類亦不效至四五日則隨乳隨吐吐其半而瀉其半腹中毫無所留矣余不得已乃用人參五六錢製附子薑桂等各一二錢下咽卽吐一滴不存而所下之乳則自

潔無氣仍猶乳也斯時也其形氣之危已萬無生理矣余含淚靜坐書室默測其故且度其寒氣犯胃而吐瀉不止若舍參薑桂附之屬尙何術焉伎已止此窘莫甚矣思之思之忽於夜半而生意起謂其胃虛已極但藥之氣味略有不投則胃不能受隨拒而出矧附子味鹹亦能致嘔必其故也因自度氣味酌其所宜似必得甘辣可口之藥庶乎胃氣可安尙有生意乃用胡椒三錢搗碎加煨薑一兩用水二鍾煎至八分另盛聽用又用人參二兩亦用水二鍾煎至一鍾另盛聽用用此二者取其氣味之甘辛純正也乃用茶匙挑合二者



以配其味凡用參湯之十加椒薑湯之一其味微甘而辣正  
得可口之宜遂溫置熱湯中徐徐挑而與之陸續漸進經一  
時許皆咽而不吐竟得獲效自後乳藥皆安但瀉仍未止也  
此自四鼓服起至午未間已盡二兩之參矣參盡後忽爾躁  
擾伸吟煩劇之甚家人皆怨謂以嬰兒嬌嫩臟腑何堪此等  
熱藥是必燒斷肚腸也相與抱泣余雖疑之而不爲亂仍寧  
神熟思之意此藥自四鼓至此若果藥有難堪何於午前相  
安而此時遽變若此其必數日不食胃氣漸復而倉廩空虛  
饑甚則然也傍有預備之粥取以示之則張皇欲得其狀甚

急乃與一小盞輒鯨吞虎嗜又望其餘遂復與半碗猶然不  
足又與半碗遂寂然安臥矣至次日復加製附始得瀉止全  
愈嗚呼此兒之重生固有天命然原其所致之因則人之臟  
氣皆繫於背褥薄夜寒則寒從背俞而入內干於臟中必淡  
矣原其所治之法則用藥雖當而氣味不投無以相入求效  
難矣及其因饑發躁使非神悟其機倘妄用清涼一解則全  
功盡棄害可言哉故余筆此以見病原之輕重氣味之相開  
及診治之活變有如此關係者雖然此特以已之兒故可信  
心救療如是設以他人之子有同是病者於用參數錢之時



見其未效不知藥未及病必且煩言吠起謗其誤治改用苦寒無不卽死而仍歸罪於用參者此時黑白將焉辨之故再噴其詳用以廣人之聞見云

都聞錢旭陽長郎年及兩週季夏間以生果傷脾因致先瀉後痢旭陽善醫知其不過傷於生冷乃與參朮薑桂溫脾等藥瀉痢不愈而漸至唇口生瘡乃謀之余曰此兒明爲生冷所傷今不利溫藥將奈之何余曰此因瀉傷陰兼之辛辣遽入而虛火上炎耳非易以附子不能使火歸原也因用二劑而唇口瘡痛咽腫倍甚外見於頭面之間而病更劇矣又謀之

余曰用藥不投如此豈真因濕生熱耶余診之曰上之脈息下之所出皆非真熱本屬陽虛今熱之不效雖屬可疑然究其所歸寒之則死必無疑也意者藥猶未及耳旭陽曰尙有一證似屬真寒今其所用湯飲必欲極滾極熱者余等不能入口而彼則安然吞之卽其喉口腫痛如此所不顧也豈其證乎余曰是矣是矣遂復增附子一錢五分及薑桂肉果人參熟地之屬其瀉漸止瀉止而喉口等證不一日而全收矣疑似之間難辨如此使非有確持之見萬無一生矣余自經此以來漸至不惑後有數兒證治大同者俱得保全億此不



惑之道其要何居在知本之所在耳臨證者可無慎哉

附按

薛氏治一小兒每飲食失節或外驚所忤即吐瀉發搐服鎮驚化痰等藥而愈後發搐益甚飲食不進雖參朮之劑到口即嘔余用白朮和土炒黃用米泔煎數沸不時灌半匙仍嘔次日灌之微嘔再日灌之欲嘔此後每服二三匙漸加至半杯不嘔乃濃煎服而愈

一小兒瀉而大便熱赤小便澀少此熱蘊於內也先以四苓散加炒黃連一劑其熱頓退又用七味白朮散去木香二劑熱渴頓止後以四君升麻調理而痊

一小兒九歲食炙煨之物作瀉飲冷諸藥不應肌體消瘦飲食少思余用黃連一兩酒拌炒焦爲末入人參末四兩粥丸小豆大每服四五十丸不拘時白湯下服訖漸愈又用五味異功散加升麻服月餘而瘥後不戒厚味患疳積消瘦少食發熱作渴用大蘆薈丸爲主以四味肥兒丸爲佐疳證漸退却以四味肥兒丸爲主以五味異功散爲佐而痊後又不禁厚味作瀉飲冷仍服肥兒丸異功散而痊

霍亂吐瀉 二十七



小兒霍亂吐瀉者必以寒涼傷胃或時氣陰濕或飲食失宜皆能致之然此與前吐瀉並行者稍有不同蓋霍亂者暴而甚吐瀉者徐而緩霍亂者傷在一時吐瀉者其傷以漸此其所以有異也○若暴疾霍亂而胃口未清胸腹仍滿者宜先用和胃飲苓朮二陳煎或大小和中飲或小分清飲或神香散之類主之俟胃口稍平即宜五味異功散或溫胃飲五苓散之類調補之○若霍亂初起便覺神疲氣倦而胃口別無脹滯者此其胃氣已傷即宜溫補如養中煎溫胃飲之類不得槩行清利也

論瀉痢糞尿色 二十八

古人有以小兒瀉痢糞黃酸臭者皆作胃熱論治此大誤也蓋飲食入胃化而爲糞則無有不黃無有不臭者豈得以黃色而酸臭者爲熱乎今以大人之糞驗之則凡胃強糞實者其色必淡黃而老蒼方是全陽正色若純黃不蒼而糞有嫩色則胃中火力便有不到之處再若淡黃則近白矣近白之色則半黃之色也糞色半黃則穀食半化之色也糞氣酸腥則穀食半化之氣也穀食半化則胃中火力盛衰可知也若必待糞青糞白氣味不臭然後爲寒則覺之遲矣故但以糞色



之淺深糞氣之微甚便可別胃氣陽和之成色智者見於未  
然而况於顯然乎余故曰古人以糞黃酸臭爲火者大誤也  
再若小水之色凡大便瀉痢者清濁既不分小水必不利小  
水不利其色必變卽清者亦常有之然黃者十居八九此因  
瀉凶陰陰凶則氣不化氣不化則水涸水涸則色黃不清此  
自然之理也使非有淋熱痛澀之證而但以黃色便作火治  
者亦大誤也

### 吐乳

小兒吐乳雖有寒熱之不同然寒者多而熱者少虛者多而實  
者少總由胃弱而然但察其形色脉證之陰陽則虛實寒熱  
自有可辨熱者宜加微清寒者必須溫補乳子之藥不必多  
用但擇其要者二三四味可盡其妙如參薑飲五味異功散  
之類則其要也若兒小乳多滿而溢者亦是常事乳行則止  
不必治也若乳母有疾因及其子或有別證者又當兼治其  
母宜從薛氏之法如左

薛氏曰前證若小兒自受驚或乳母恚怒致兒吐瀉青色者宜  
用異功散○若母食厚味而乳熱者用東垣清胃散○母飲  
酒而乳熱者用葛花解醒湯子服一二匙○若飲燒酒而乳



熱或子身赤或昏憤服冷米醋三五杯多亦無妨兒服一  
二匙○若母停滯生冷而乳冷者母服人參養胃湯子服調  
中丸○若母停滯而變熱乳者母服大安丸子服五味異功  
散○若母鬱怒傷肝脾而乳熱者用歸脾湯逍遙散○若母  
脾虛血弱而乳熱者用六君子加芎歸○若母氣血虛而乳  
熱者子母俱服八珍湯○若母勞後發熱而乳熱者子母俱  
服補中益氣湯○若因怒動肝火而乳熱者用五味異功散  
加柴胡山梔○若吐痰涎及白綠水者木乘脾土虛寒證也  
用六君子加柴胡木香○大凡吐乳瀉青色者屬驚法當平

肝補脾吐瀉青白色者屬寒法當溫補脾土○前諸證若手  
足指熱者屬實手足指冷者屬虛此亦驗法也

五疳證 三十

錢仲陽曰小兒諸疳皆因病後脾胃虧損或用藥過傷不能傳  
化乳食內亾津液虛火妄動或乳母六淫七情飲食起居失  
宜致兒爲患凡疳在內者目腫腹脹瀉痢青白體漸瘦弱疳  
在外者鼻下赤爛頻揉鼻耳或肢體生瘡大抵其證雖多要  
不出於五臟而五臟之疳不同當各分辨治之○肝疳者一  
名筋疳亦名風疳其證白膜遮睛或瀉血而瘦宜用地黃丸



以生腎○心疔者面黃頰赤身體壯熱宜用硃砂安神丸以  
治心異功散以補脾○脾疔者一名肥疔體黃瘦削皮膚乾  
澁而有瘡疥腹大嗜土宜用四味肥兒丸以治疔五味異功  
散以生土或用益黃散○肺疔者一名氣疔喘嗽氣促口鼻  
生瘡宜用人參清肺湯以治肺益氣湯以生金○腎疔者一  
名骨疔肢體瘦削遍生瘡疥喜臥濕地用地黃丸○鼻瘡用  
蘭香散諸瘡用白粉散○若患潮熱當先補肝後瀉心若妄  
以硝黃等藥利之則成疔○若患癖當消磨若誤以巴豆礪  
砂下之或傷寒誤下皆能成疔○其初病者爲熱疔用黃連  
丸久病者爲冷疔用木香丸冷熱相兼者用如聖丸津液短  
少者用七味白朮散○凡此皆因大病脾胃虧損內亾津液  
所致當固脾胃爲主而早爲施治則不變敗證也

楊氏曰無辜疔者腦後項邊有核如彈丸按之轉動軟而不疼  
其內有虫不速鍼出則內食臟腑肢體癰疽便利膿血壯熱  
羸瘦頭露骨高宜用大蕪黃湯蟾蜍丸○丁奚者手足極細  
項小骨高尻削體痿腹大臍突號哭胸陷宜用肥兒丸大蘆  
薈丸○哺露者虛熱往來頭骨分開翻食吐虫煩渴嘔噦宜  
用肥兒丸大蘆薈丸○走馬疔者牙齒蝕爛蓋齒屬腎腎虛



受熱痰火上炎致口臭齒黑甚則齲爛牙宜敷雄黃散服蟾蜍丸○若作渴瀉痢腫脹勞瘵等證當詳參方論而治之○蓋疳者乾也因脾胃津液乾涸而患在小兒爲五疳在大人爲五勞總宜以調補胃氣爲主

又楊氏曰又有疳傷者五臟虫疳也其名甚多姑舉其要○虫疳者其中如絲出於頭項腹背之間黃白赤者可治青黑者難治○蛔疳者顰眉多啼嘔吐青沫腹中作痛肚脹青筋唇口紫黑頭搖齒痒○脊疳者身熱羸黃煩渴下利拍背有聲脊骨如鋸齒十指皆瘡頰齒指甲○腦疳者頭皮光急滿頭

并瘡腦熱如火髮結如穗遍身多汗頰腫顙高○疳渴者日則煩渴飲水不食夜則渴止○疳瀉者毛焦唇白額上青紋肚脹腸鳴瀉下糟粕○疳利者停積宿滯水穀不聚瀉下惡物○疳腫者虛中有積肚腹緊脹脾復受濕則頭面手足虛浮○疳勞者潮熱往來五心煩熱盜汗骨蒸嗽喘枯悴渴瀉飲水肚硬如石面色如銀○大抵其證雖多要不出於五臟總宜以五臟之法治之

景岳曰按楊氏云疳者乾也在小兒爲五疳在大人爲五勞然旣云爲乾又云爲勞豈非精血敗竭之證乎察前諸法俱從



熱治多用清涼雖此證真熱者固多而元氣既敗則假熱者尤多也卽前所用亦有地黃丸異功散益黃散益氣湯之類恐此數方有不足以盡之其或血氣俱損有非大補不可者陰虛假熱脾敗腎虧又有非溫補不可者貴在臨證酌宜仍當以虛損治勞之法參用庶得盡善

薛氏曰按瘡證或以哺食大早或嗜食甘肥或服峻厲之藥重入津液虛火熾盛或因稟賦或乳母厚味七情致之各當調治其內○若口舌蝕爛身體壯熱頰唇赤色或作腫痛腹膈煩悶或掌熱咽乾作渴飲水便赤盜汗嚙齒虛驚此心經內

外疳也宜安神丸之類主之○若鼻外生瘡眼目赤爛肢體似癰兩耳前後項側缺盆兩腋結核或小腹內股玉莖陰囊辜丸腫潰小便不調或出白津或咬指甲搖頭側目白膜遮睛羞明畏日肚大青筋口乾下血此肝經內外疳也用地黃蘆薈二丸主之○若頭不生髮或生瘡痂或髮成穗或人中口吻赤爛腹痛吐逆乳食不化口乾嗜土瀉下酸臭小便白濁或合目昏睡惡聞木音此脾經內外疳也用肥兒丸主之○若鼻外生瘡咽喉不利頸腫齒痛欬嗽寒熱皮膚皺錯欠伸少氣鼻痒出涕衄血目黃小便頻數此肺經內外疳也用



地黃清肺飲主之。○若腦熱吐痰手足逆冷寒熱往來滑泄  
肚痛口臭作渴齒齦潰爛爪黑面鰲身耳生瘡或耳出水或  
食自髮此腎經內外疳也用地黃丸主之。○凡疳熱上攻或  
痘毒上升爲患甚速名爲走馬疳急敷雄黃散搽牙散馬鳴  
散擇而用之服蟾蜍丸輕則牙齦腐爛唇吻腫痛可治甚則  
牙齦蝕落顙頰透爛不治。

盜汗 三十一

小兒元氣未充腠理不密所以極易汗出故凡飲食過熱或衣  
被過煖皆能致汗東垣諸公云此是小兒常事不必治之然

汗之根本由於營氣汗之啓閉由於衛氣若小兒多汗者終  
是衛虛所以不固汗出既多未免營衛血氣愈有所損而衰  
羸之漸未必不由乎此此所以不可不治也大都治汗之法  
當以益氣爲主但使陽氣外固則陰液內藏而汗自止矣

一治法凡小兒無故常多盜汗或自汗者宜以團參散爲主或  
參苓散四君子湯五味異功散或白朮散之類俱可擇用○  
若其甚者宜三陰煎人參養營湯或十全大補湯○若心經  
有火而見煩渴者宜生脈散一陰煎○若肝脾火盛內熱薰  
蒸血熱而汗出者脈必洪滑證多煩熱宜當歸六黃湯或加



減一陰煎○若陽明實熱汗出大渴者宜仲景竹葉石膏湯  
 ○若因病後或大吐大瀉之後或誤用剋伐之藥以致氣虛  
 氣脫而大汗出陽者速宜用參附湯六味回陽飲或芪附湯  
 之類庶可挽回也○大都汗多出陽者多致角弓反張項強  
 戴眼等證此太陽少陰二經精血耗散陰虛血燥而然速宜  
 用大營煎人參養營湯或十全大補湯之類方可解救若作  
 風治萬無一生矣○前汗證門有詳論詳法所當參閱○余  
 之兒輩有於襁褓中多盜汗者但以人參一錢泡湯與服當  
 夜即止久不服參必又汗出再服再止其效如神凡養兒者  
 亦可以此為常法

腹脹腹痛 三十二

小兒腹脹腹痛多因食積或寒涼傷脾而然內經曰病痛者陰  
 也又曰痛者寒氣多也有寒故痛也東垣曰寒脹多熱脹少  
 皆主於脾胃故凡小兒肚腹或脹或痛雖曰多由積滯然脾  
 胃不虛則運化以時何致作脹是脹必由於虛也若胃氣無  
 傷而腹中和煖則必無留滯作痛是痛多由乎寒也故治痛  
 治脹者必當以健脾煖胃為主若無火證不得妄用涼藥若  
 無拒按堅實等證不得妄用攻藥



一治法凡小兒肚腹膨脹或時常作痛黃瘦常用調理之法惟芍藥枳實丸加減用之爲宜且善止腹痛或大健脾丸楊氏啟脾丸和中丸之類皆可酌用○若偶爾傷脾氣促困倦外見腹脹而內不脹者此脾氣虛也宜五味異功散或六味異功煎○若脾胃陽氣不足虛寒作脹或畏寒或手足冷或兼嘔瀉者宜五君子煎養中煎溫胃飲六君子湯或調中丸○若兼脾腎陽虛或水泛爲痰或喘促痛脹泄瀉宜理陰煎加減主之○若脾胃氣虛而痛滯吐瀉者宜六味異功煎或六君子湯加木香或調中湯○若胃口偶有留滯大痛而脹者宜排氣飲或益黃散○若宿食偶有不消而暫爲脹滿者宜大小和中飲或和保丸消食丸○若有堅積停滯脹痛拒按形氣俱實者宜赤金豆白餅子紫霜丸之類攻下之○凡諸未盡當於腹痛腫脹二門參酌爲治

余初年在京治一五歲隣女適經藥舖見有晒晾巴豆其父誤以爲松仁以一粒與食之嚼而味辣卽忙吐出而已半粒下咽矣少頃大瀉十餘次瀉後次日卽致肚腹通身悉皆腫脹絕口不食因求治於余或謂宜黃連綠豆以解毒或謂宜四苓五皮以利水余曰大攻之後豈非大虛之證乎能再堪苦



寒以敗脾否大瀉之後又尙有何水之可利遂單用獨參湯  
及溫胃飲以培脾氣不數劑而復元如初夫旣以大瀉而何  
以反脹若是因此一證乃知大虛大寒而致成腫脹者類多  
如此新按

痞塊 三十三

小兒多有痞塊者總由口腹無節見食必啖食上加食脾胃化  
之不及則胃絡所出之道未免漸有雷滯雷滯不已則日以  
益大因成痞矣或以感寒發熱之後胃氣未清此時最宜擇  
食節食若不知慎則食以邪留最易成痞此實人所不知也

第痞塊旣成必在腸胃之外膜膈之間故非可以消伐之劑  
推逐而去者若但知攻痞則胃氣益弱運化失權不惟不能  
消痞且致脾土虧損則痞邪益橫而變證百出矣故治此者  
當酌其緩急專以調補胃氣爲主外則用膏用灸以拔其結  
絡之根庶爲萬全之策

一凡調理脾胃之法若痞邪未甚宜芍藥枳實丸加減用之爲  
善或大健脾丸及楊氏啟脾丸皆可擇用○若脾胃氣虛食  
少體瘦宜五味異功散○若脾胃虛寒者宜調中丸溫胃飲  
五君子煎○若兼胃脘停積食滯作脹者宜保和丸消食丸



或大小和中飲。○若脹急堅實，形氣尚強，不得不瀉者，宜赤金豆白餅子。○若痞久成熱，致動陽明之火，而牙口潰爛成疔者，宜蘆薈丸、胡黃連丸，或蟾蜍丸。○此外如貼痞膏及灸治之法，俱詳載積聚門。

癩痢

三十四

錢仲陽曰：小兒發癩，因血氣未充，神氣未實，或為風邪所傷，或為驚怪所觸，亦有因妊娠時七情驚怖所致。若眼直目牽，口噤涎流，肚膨發搐，項背反張，腰脊強勁，形如死狀，終日不醒，則為疔矣。○凡治五癩，皆隨臟治之，每臟各有一獸之形，通

用五色丸為主，仍參以各經之藥，發而重者死，病甚者亦死。

○如面赤目瞪，吐舌嚙唇，心煩氣短，其聲如羊者，曰心癩，血虛者用養心湯，發熱飲冷為實熱，用虎睛丸，發熱飲湯為虛熱，用辰砂妙香丸。○面青唇青，兩眼上竄，手足攣掣反折，其聲如犬者，曰肝癩，肝之虛者用地黃丸，抽搐有力為實邪，用柴胡清肝散，大便不通用瀉青丸。○面黑目振，吐涎沫，形體如尸，其聲如猪者，曰腎癩，用地黃丸、紫河車丸之類，腎無瀉法，故徑從虛治之。○面如枯骨，目白反視，驚跳反折，搖頭吐沫，其聲如鷄者，曰肺癩，肺氣虛者用補肺散，面色痿黃者，土



不能生也。用五味異功散。面色赤者。陰火上衝於肺也。用地黃丸。○面色痿黃。目直腹滿。自利四肢不收。其聲如牛者。曰脾癰。用五味異功散。若面青瀉利。飲食少思。用六君子加木香柴胡。○若發熱抽掣仰臥。面色光澤。脈浮者。病在腑。為陽證。易治。身冷不搐。覆臥。面色黯黑。脈沉者。病在臟。為陰證。難治。○凡有此證。先宜看耳後高骨間。若有青脈紋。先抓破出血。可免其患。此皆元氣不足之證也。須以紫河車丸為主。而以補藥佐之。設若泛行尅伐。復傷元氣。則必不時舉發。久而變危。多致不救。○又有驚癰。風癰。食癰。三種。治驚癰宜比金

九。茯神丸。錢氏養心湯。辰砂妙香散。清神湯。虎睛丸之類。主之。風癰用錢氏牛黃丸。消風丸。星蘇散之類。主之。食癰用妙聖丹。主之。

薛立齋曰。妊娠若遇驚恐。則必內應於胎。故一月足厥陰脈養。驚則肝有病。二月足少陽脈養。驚則胆受病。三月手少陰脈養。驚則心受病。四月名為離經。五月足太陰脈養。驚則脾受病。六月足陽明脈養。驚則胃受病。七月手太陰脈養。驚則肺受病。八月手陽明脈養。驚則大腸受病。九月足少陰脈養。驚則腎受病。是臟腑納氣於丹田。自肝至腎。十經滋養而生。此



則胎中所致也。若既生之後，或驚怪所觸，或乳哺失節，或乳  
母飲食起居六淫七情，臟氣不平，亦致是證。須察見證屬於  
何經，更別陰陽，以調補脾胃為主。否則不時舉發，甚至不救。

附按

薛氏治一小兒，患前證，吐痰困倦，半餉而甦。諸藥不效，年至十  
三，而頻發。用肥厚紫河車生研爛，入人參、當歸末、搗九桐子  
大，每服三五丸，日進三五服，乳化下，一月漸愈。又佐以八  
珍湯全愈。

又一兒七歲，發驚癇，令其恣飲人乳，後發漸疎而輕。至十四  
復發，用乳不效，亦用河車丸數具而愈。常用加減八味丸而  
安。後至二十三歲復發，而手足厥冷，仍用前法，佐以八味丸  
十全大補湯而痊。

又治數小兒，皆以補中益氣湯六君子湯六味八味等丸，相  
間用之，皆得全愈。

癩癇諸經義及大人證治諸法，俱詳載癩狂門，所當參閱。

溺白 三十五

小兒便如米泔，或溺停少，頃變作泔濁者，此脾胃濕熱也。凡飲  
食不節者，多有此證。然亦有氣虛下陷而然者。○若脉證兼



火者當清利宜導赤散或四味肥兒丸○若飲食過傷兼脹滯者宜保和丸大安丸○若形氣不足或黃瘦或嘔泄者宜五味異功散或四君子湯或補中益氣湯○若肝腎火盛移熱膀胱者必兼痛澀煩熱宜七味龍胆瀉肝湯○若脾胃本虛而復兼濕熱者宜四君子湯加炒黃連○若止見溺白而別無煩熱脈證則但節其生冷水果及甘甜等物不久自愈切不可因其溺白而過用芩連梔子之類多致傷脾而反生吐瀉等證漸至羸敗者是皆誤治之害也不可不察

變蒸 三十六

巢氏云小兒變蒸者以長血氣也變者上氣蒸者體熱錢仲陽曰變者易也小兒右母腹中乃生骨氣五臟六腑成而未全自生之後即長骨脈臟腑之神志自內而長自下而上故以生之日後三十一日一變蒸即覺情志有異於前何也長生意志臟腑故也何謂三十二日長骨添精神蓋人有三百六十五骨節以應天數內除手足中四十五碎骨外共有三百二十數自下生骨一日十段而上之十日百段而三十二日計三百二十段為一遍亦曰一蒸凡一周遍乃生虛熱諸病如是十周則小蒸畢也故初二十二日一變生腎志六十四



日一變一蒸生膀胱九十六日三變生心喜一百二十八日  
四變二蒸生小腸一百六十日五變生肝哭一百九十二日  
六變三蒸生膽一百二十四日七變生肺聲二百五十六日  
八變四蒸生大腸二百八十八日九變生脾三百二十日十  
變五蒸生胃此所謂小蒸畢也又手厥陰經爲臟手少陽經  
三焦爲腑此一臟一腑俱無狀故不變不蒸也大倉云氣入  
四肢長碎骨於十變後六十四日爲一大蒸計三百八十四  
日又六十四日爲二大蒸計四百四十八日又六十四日爲  
三大蒸計五百一十二日至五百七十六日變蒸既畢兒乃

成人也變者生五臟也蒸者養六腑也每經一變一蒸情態  
卽異輕則發熱微汗其狀似驚重則壯熱脈亂而數或汗或  
吐或煩啼躁渴輕者五日解重者七八日解其候與傷寒相  
似其治法平和者微表之實熱微利之用紫霜丸黑散子柴  
胡散有寒無熱并吐瀉不乳多啼者當歸散調氣散主之

薛立齋曰全兒方論云變蒸者以長氣血也變者上氣蒸者發  
熱也輕則體熱虛驚耳冷微汗唇生白泡三日可愈重則寒  
熱脈亂腹痛啼叫不能乳食食卽吐呢五日方愈古方以黑  
散子紫霜丸主之竊謂此證小兒所不免者雖勿藥可也况



前藥乃屬峻厲非惟臟腑不能勝抑且反傷氣血慎之慎之  
余嘗見一小兒至二變發熱有痰投以抱龍丸一粒卒至不  
救觀此可驗矣若不熱不驚略無證候而暗變者蓋受胎氣  
壯實故也

景岳曰小兒變蒸之說古所無也至西晉王叔和始一言之繼  
自隋唐巢氏以來則日相傳演其說益繁然以余觀之則似  
有未必然者何也蓋兒胎月足離懷氣質雖未成實而臟腑  
已皆完備及既生之後凡長養之機則如月如苗一息不容  
有間百骸齊到自當時異而日不同豈復有此先彼後如一

軒岐再出

變生腎二變生膀胱及每變必三十二日之理乎又如小兒  
之病與不病余所見所治者蓋亦不少凡屬違和則不因外  
感必以內傷初未聞有無因而病者豈真變蒸之謂耶又見  
保護得宜而自生至長毫無疾痛者不少抑又何也雖有暗  
變之說終亦不能信然余恐臨證者有執迷之誤故道其愚  
昧若此及如前薛氏之戒皆不可不察也明達者以為然否

小兒下論列方 三十七

理中湯 熱一

理中丸 同上

十全大補湯 補二十

養中煎 新熱四



溫胃飲 新熱五

六味地黃丸 補一二二

理陰煎 新熱三

胃關煎 新熱九

八味地黃丸 補一二二

四君子湯 補一

五君子煎 新熱六

加減八味丸 補一二三

六君子湯 補五

歸脾湯 補三三

補中益氣湯 補三一

八珍湯 補十九

白朮散 和三十

人參養營湯 補二二

生脈散 補五七

逍遙散 補九三

人參養胃湯 小四一

參薑飲 新熱八

團參散 小三五

人參安胃散 小四二

益黃散 和十九

大營煎 新補十四

人參清肺湯 寒二六

一陰煎 新補八

三陰煎 新補十一

加減一陰煎 新補九

參附湯 補三八

芪附湯 補四四

五味異功散 補四

參苓散 補五四

安神丸 寒一四三

當歸六黃湯 寒六四

茯神湯 小六十

清神湯 小六一

六味異功煎 新熱七

虎睛丸 小百一



調中湯 小二

調中丸 小三

六味回陽飲 新熱二

保和丸 小三五

和中丸 和八七

參朮二陳煎 新和四

六安煎 新和二

二陳湯 和一

芍藥枳朮丸 新和十六

大安丸 小三六

大健脾丸 和八五

啟脾丸 和八六

和胃飲 新和五

排氣飲 新和六

大和中飲 新和七

小和中飲 新和八

竹茹湯 和一二一

地黃清肺飲 小六九

五苓散 和一八二

瀉黃散 寒五七

錢氏養心湯 小五九

四苓散 和一八七

胃苓湯 和百九十

硃砂安神丸 寒一四二

益元散 寒百十二

小分清飲 新和十

辰砂妙香散 固十五

蘭香散 小百十

玉泉散 新寒十五

東垣清胃散 寒五四

柴胡散 小二一

導赤散 寒一二二

葛花解酲湯 和一二四

星蘇散 小二四

香連丸 寒百十三

五物香薷飲 和百七十



比金丸 小百

消風丸 小百四

十味香薷飲 和一七一

妙聖丹 小百五

紫河車丸 小百九

橘皮竹茹湯 和一二二

消食丸 小三七

胡黃連丸 小一二二

藿香安胃散 熱七二

黃連丸 小一三一

如聖丸 小一二六

竹葉石膏湯 寒五

紫霜丸 小百三十

木香丸 小百二十

龍胆瀉肝湯 寒六三

白餅子 小三九

抱龍丸 小八五

錢氏牛黃丸 小九二

黑散子 未收

赤金豆 新攻二

四味肥兒丸 小百十二

馬鳴散 痘一三八

大蘆薈丸 小百十五

大蕪黃湯 小百八

蟾蜍丸 小一二三

白粉散 外一九六

擦牙散 痘一三五

雄黃散 痘一三三

聖木煎 新熱二五

助胃膏 小六

神香散 新和二十

景岳全書卷之四十一終

全書卷四十一

小兒下 列方

七



景岳全書卷之四十一

轉香蜡 煉味二十

望米煎 煉味二正

熱下蜡 煎一三正

融銀式 小一二三

大黃膏式 小百十五

四和膠原式 小百十一

黑蜡干 煉味二

小兒不候式

妙聖丹 小百五

補皮竹葉湯 煎一二三

地胃膏 小六

蘇黃蜡 煎一三三

白銀蜡 煎一此六

大黃黃黑 小百八

黑銀蜡 煎一三八

赤金豆 煉味二

景岳全書麻疹詮目錄謨集

卷之四十二

麻疹全

述原一

疹逆順三

疹證五

麻疹初熱七

疹形色九

疹吉凶十一

名義二

疹脉四

疹期六

疹出沒

疹第

總論治法十二



疹禁忌 十三

疹發熱 十四

疹喘嗽 十五

疹吐瀉 十六

疹飲食 十七

疹飲水 十八

疹渴 十九

疹汗衄 二十

疹躁妄狂亂 二十一

疹咽痛 二十二

疹唇口瘡 二十三

疹腹痛 二十四

疹後諸證 二十五

附麻疹 二十六

水痘 二十七

論列方 二十八

景岳全書麻疹目錄終

景岳全書卷之四十二謨集

麻疹詮

會稽 張介賓 會啣著

會稽 魯 超 謙菴訂

# 麻疹

全

述原

景岳子曰痘之與疹原非一種雖痘之變態多證而疹之收斂稍易然疹之甚者其勢凶危亦不減於痘最為可畏蓋疹毒痘毒本無異也第古人重痘而忽疹多不詳及使後人無所



全書卷四十二  
宗法余實悵之自得羅田萬氏之刻見其理透法精鄙念斯  
慰今悉從其訓備述於此雖其中稍有裁訂亦不過正其疑  
似詳其未詳耳使此後患疹者幸獲迷津之指南亦以見萬  
氏之功爲不少矣

名義

疹者痘之末疾惟一經受證脾與肺也內應於手足太陰外合  
於皮毛肌肉是皆天地間疹戾不正之氣故曰疹也然其名  
目有異在蘇松曰沙子在浙江曰醋子在江右湖廣曰麻在  
山陝曰膚瘡曰糠瘡曰赤瘡在北直曰疹子名雖不同其證

則一但疹在痘前者痘後必復疹惟痘後出疹者方爲結局

疹逆順

三

萬氏曰疹以春夏爲順秋冬爲逆以其出於脾肺二經一遇風  
寒勢必難出且多變證故於秋冬爲不宜耳夫天行不正之  
氣致爲人之瘍疹然古人於痘疹二字始終歸重於痘並不  
分別疹爲何物豈可以二證歸於一證耶想當時重痘不重  
疹故爾略之致使後人不得心法因而害事者往往有之今  
以吾家四代傳流以及今日心得之法開載於後用此應痘  
定不差矣敢有毫釐隱匿天其鑒之



疹脈四

凡出疹自熱起至收完但看右手一指脈洪大有力雖有別證亦不爲害此定存亾之要法也

景岳曰按此卽陽證得陽脈之義若細軟無力則陽證得陰脈矣元氣旣弱安能勝此邪毒是卽安危之基也故凡診得陰脈者卽當識爲陰證而速救元神宜用傷寒溫補托法參酌治之若執以麻疹爲陽毒而槩用清寒則必不免矣

疹證五

疹雖非痘之比然亦由胎毒蘊於脾肺故發於皮毛肌肉之間但一時傳染大小相似則本有不由天行瀉氣而發者此其源雖內發而證多屬表故其內爲胎毒則與痘證同外有表邪則與傷寒類其爲毒也總由君相二火燔灼太陰而脾肺受之故其爲證則有欬嗽噴嚏面腫腮赤目胞浮腫眼淚汪汪鼻流清涕呵欠悶頓乍涼乍熱手足稍冷夜臥驚悸或惡心嘔噦或以手搯面目唇鼻者是卽出疹之候便宜用解毒散邪等藥不使留停於中庶無他患且凡是疹證必其面赤中指冷而多嗽又必大熱五六日而後見紅點遍身此其所以與痘與傷寒有異也



一痘欲盡發而不留疹欲盡出則無病邪氣鬱遏則留而不去  
正氣損傷則困而不伸毒歸五臟變有四證歸脾則泄瀉不  
止歸心則煩熱不退而發驚歸肺則欬嗽血出歸腎則牙齦  
爛而疳蝕

程氏曰麻疹初出類傷風寒頭疼欬嗽熱甚目赤頰紅一二日  
內即出者輕必須解表忌見風寒葷腥厚味如犯之恐生痰  
涎變爲驚搐必致危矣如初起吐瀉交作者順乾嘔霍亂者  
逆欲出不出者危亾立至

徐氏曰痘自裏而出於臟故重疹自表面而出於腑故輕

景岳曰痘疹之屬有四種曰痘曰疹曰麻曰班也痘則陸續漸  
出自小而大或稀或密部位顆粒有辨也疹則一齊發出大  
者如蘇子次者如芥子小者如蚕子而成粒成片者是也麻  
則最細而碎如蚊迹模糊者是也班則無粒惟成片紅紫如  
雲如錦者是也大都疹與麻班同類即發班傷寒之屬而痘  
則本非其類也蓋痘毒本於肝腎出自中下二焦是以終始  
不妨於食而全賴水穀爲主所以能食則吉不能食則凶故  
治痘者不可不顧脾胃麻疹之毒則由表邪不解而內犯太  
陰陽明病在上中二焦所以多不能食故治麻疹者但宜解



散火邪邪散則自能食矣是痘疹之治當各有所重者如此  
疹期六

出疹之候初熱一日至次日鷄鳴時其熱即止止存五心微熱  
漸見欬嗽鼻流清涕或腹中作痛飲食漸減到申酉之間其  
熱復來如此者四日用手滿按髮際處甚熱其面上熱少減  
一二三分欬嗽連聲面燥腮赤眼中多淚噴嚏頻發或忽然鼻  
中出血至五日其熱不分晝夜六日早時其疹出在兩頰下  
細細紅點至午時兩手背並腰下及渾身密密俱有紅點七  
日普徧掀發其鼻中清涕不流噴嚏亦不行七日晚兩頰顏  
色漸淡此驗出疹之要法

凡疹熱六日而出一定之規也若醫人無識用藥太早耗散元  
氣及至出時變害多矣或嗽而變喘或出一二日即隱或作  
大瀉或合日而喘此醫人用藥不當之害也吾家治法定不  
在五日内用藥必待見疹方用徐徐升表然用藥亦有次第  
凡一劑必作十餘次飲之况疹在皮膚之間若作一次服則  
藥性催之太急每致譫語煩躁故當慎之

景岳曰按此萬氏之法謂醫人用藥太早恐致耗散元氣故  
必待見點而後施治及作一次服恐藥性催之太急皆惟恐



無益而反以致害此固其心得之法也然以愚見則醫有高下藥有宜否但使見有確真發無不當則於未出之前或解或補必有得愈防之力以潛消其毒者既出之後亦必有善調之方而不致催急者此在善與不善或不嫌早與不早也嘗見庸流之誤治者多是誠不服藥為中醫也此萬氏之說所以不可不遵

凡疹熱五六日必出矣醫人用藥見不能散父母見藥不效醫人見熱嗽不能除或以別證治之主家又或更醫此世之所誤者多矣

### 麻疹初熱

七

麻疹發熱之初與傷寒相似惟疹子則面頰赤欬嗽噴嚏鼻流清涕目中有淚呵欠喜睡或吐瀉或手搯眉目面赤為異耳但見此候即是疹子便宜謹避風寒戒葷腥厚味古法用升麻葛根湯以表散毒邪余製透邪煎代之更佳或柴歸飲亦妙但使皮膚通暢腠理開豁則疹毒易出不可作傷寒妄加汗下也妄汗則增熱而為衄血欬血為口瘡咽痛為目赤腫為煩燥乾渴為大小便不通妄下則裏虛為滑泄為滯下經口必先歲氣毋伐天和言不可妄汗妄下也



凡疹初熱疑似之間切不可輕易用藥總有他證必待五日  
下見疹方可用升表之劑嗽多連打嚏噴鼻流清涕或流鼻  
血飲食減少好飲涼水只宜調理飲食戒麪食葷腥

一疹子初發熱時未見出現咳嗽百十餘聲不已上氣喘急面  
目胞腫時臥時起此火毒內蒸肺葉焦舉宜甘桔湯合白虎  
湯加牛旁子薄荷主之○如疹出之時欬嗽口乾心煩者此  
毒在心肺發未盡也瀉白散加天花連翹玄參黃連主之

一疹子欲出未出之時宜早為發散以解其毒則無餘患若不  
預解使之盡出多致毒蓄於中或為壯熱日久枯瘁或成驚  
癇或為瀉痢或為欬血喘促或作疳蝕而死此雖一時戾氣  
之染然未有不由於人事之未盡也

疹出沒八

一疹子出沒常以六時為準假如子後出午後即收午後出子  
後即收乃陽生陰成陰生陽成造化自然之數也凡此旋出  
旋收者輕若一出連綿三四日不收者乃陽毒太甚宜大青  
湯或用荆芥牛旁子甘草玄參石膏桔梗主之○若逡巡不  
出者乃風寒外束皮膚閉密也宜荆防敗毒散主之  
一疹已出而復沒者乃風寒所逼而然若不早治毒必內攻以



致痒癢而死急用升麻湯加荆芥牛旁子甘草熱服則疹必復出而安矣

一發熱六七日以後明是疹子却不見出此必皮膚堅厚腠理閉密或為風寒所襲或曾有吐瀉皆能伏也急用托裏散表之劑如麻黃湯去杏仁加蟬退升麻外用胡荽酒之類○如一向未更衣者必毒甚於內伏而不出局方涼膈散加牛旁子主之

一疹子只怕不能得出若出盡則毒便解故治疹者於發熱之時當察時令寒暄酌而治之○如時證大寒以桂枝葛根湯

或麻黃湯發之○時證大熱以升麻葛根湯或合人參白虎湯發之○不寒不熱以荆防敗毒散發之○如兼疫癘之氣以人參敗毒散發之○如盡一劑不出再作本湯服之外用胡荽酒又以苧麻醮酒遍身搵之務令亟出如三四作更不出加腹中脹痛氣喘昏悶則死證也

景岳曰按此萬氏之法極得隨時制宜之善已盡發表之義矣然發表之義亦最不易即如營衛不足而疹有不能出者其證甚多若徒知發之而不知滋之則營衛有弱者非惟不能發而且恐窮其源矣此其或在脾胃或在血氣必得其神



庶乎有濟如傷寒三表之法實亦有關於此

一疹毒出盡則邪氣解散正氣自然和平如發熱煩悶或嘔吐或泄瀉此毒邪壅遏尚未出盡也○煩熱者黃連解毒湯○嘔泄者柴胡橘皮湯○並外用胡荽酒及苧麻戛法如前待疹子出盡則煩熱自去嘔吐自止矣

一疹有既收而餘毒未盡至三日之外又復發出或至五六次不已者此因發熱之時不避風寒致令邪氣鬱於肌肉之間留連不散雖曾解散終屬未暢耳若兼雜證亦當隨證治之

### 疹形色

九

凡看麻疹初出之法多於耳後項上腰腹先見其頂尖而不長其形小而勻淨者吉也若色見通紅則疹發於心紅者火之正色也若疹色淡白者心血不足也養血化斑湯主之或四物湯加防風色大紅燄或微紫者血熱也或出太甚者並宜大青湯主之或四物湯去川芎加柴胡黃芩乾葛紅花牛蒡子連翹涼血滋陰而熱自除所謂養陰退陽之義亦五死一生之證也若黑色者則熱毒尤甚而十死一生之證此尤不可不明察之而混為施治也

凡疹初出色赤者毒盛之勢也但大便調咳嗽多右手一指脈



輕重取皆有，力雖勢重不碍，但當隨證調理。若嗽少，右手一指脈無力，雖三日後收其渾身疹瘡，變為紫色，壅結於皮膚之間。若用解利之藥，其色漸轉紅色，嗽多流涕，頗思飲食者，生若投二三劑，難變者難療也。

疹涕 十

凡疹出至二三日，必兩鼻俱乾，待收完看毒氣輕者，清涕即來，就思飲食，此不必服藥。若清涕來遲，不思飲食者，須要清肺解毒，必俟清涕出方可不用藥。

疹吉凶 十一

或熱或退五六日而後出者輕。

透發三日而漸沒者輕。

淡紅滋潤，頭面勻淨而多者輕。

頭面不出者重。

紅紫黯燥者重。

咽喉腫痛不食者重。

冒風沒早者重。

移熱大腸變痢者重。

黑黯乾枯一出即沒者不治。



鼻扇口張日無神者不治

鼻清糞黑者不治

氣喘心前吸者不治

總論治法 十二

疹喜清涼而惡濕痘喜溫煖而惡涼此固其大法也然亦當有得其宜者如疹子初出亦須和緩則易出所以發苗之初只要發出得盡則疹毒便解非若痘之苗而秀秀而實而後毒解也痘子成熟之時若太溫熱則反潰爛不收是痘之後亦喜清涼也故治痘疹者無過熱無過寒必溫涼適宜使陰

陽和平是為得之

一痘宜內實可用補劑疹忌內實只惟解散惟初熱發表時略相似耳既出之後痘宜補氣以生血疹宜補陰以制陽何也蓋疹熱甚則陰分受其熬煎而血多虛耗陰金被尅故治以清火滋陰為主而不可少動其氣若燥悍之劑首尾皆淡忌也世知痘證所係之重而不知疹之殺人尤甚方書多忽而不備良可太息也矣

一斑疹之毒皆由於火內經口赫曦之紀其病瘡瘍故或遇二火司天或司運之歲肺金受制感而發者居多輕則如蚊迹



之狀或壘腫於皮膚間名曰癰疹重者如珠點紅暈或片片如錦紋名曰斑疹大抵色赤者吉色黑者凶其證似傷寒發熱凡三四日而出七八日而靨也凡此之類皆屬邪熱治之之法惟辛涼解利而已卽若吐瀉亦斷不可用溫補也如豆蔻乾薑之類切勿輕用而初發之時尤不可大汗只宜升麻葛根透邪煎之屬微表之耳故用宜斟酌有不可一槩取必也

一標出不紅現而發熱轉甚或頭痛身痛煩躁者升麻湯或透邪煎

一色赤稠密身痛煩躁者升麻湯加紫草連翹

一寒熱併作頭痛背强者升麻湯加羌活防風連翹

一頭項面腫升麻湯加牛蒡子荆芥若脉強火盛熱渴者宜清降其火以白虎湯加減用之

一自汗煩渴氣壅脉數者化斑湯

一身熱煩渴泄瀉者柴苓湯或四苓散如夏月益元散

一熱甚小便赤澀譫語驚恐者導赤散四苓散加辰砂夏月益元散加辰砂

一欬嗽甚者二母散麥門冬湯清肺湯



一喘者小柴胡湯去人參加五味子

一熱甚鼻衄或便血溺血熱甚者黃連解毒湯血甚者犀角地

黃湯

一傷食嘔吐六君子湯加藿香乾葛或減去人參○熱甚嘔吐

者解毒湯○小便不利而嘔吐者四苓散一二日不通者導

赤散

一大便秘結發熱身痛者大柴胡湯腹脹氣喘者前胡枳殼湯

一咽喉不利甘桔湯兼風熱欬嗽者加防風

一寒熱往來似瘧小柴胡湯如兼欬嗽去人參

一屬後身熱不除者升麻湯或去升麻加黃芩黃連各酒炒用

一下痢赤白腹痛者黃芩芍藥湯或加枳殼身熱腹痛者解毒

湯

一餘毒未盡變生癰疽瘡癤者升麻湯加防風荆芥牛旁子

景岳曰按以上萬氏治疹諸條皆極詳妥然其中惟瀉痢氣喘

一二證則最多疑似蓋一證之由疹毒固當如其治矣然有不

因疹毒者如俗醫但見是疹無不槩用寒涼不知有可涼者

有不可涼者其有脾氣本弱而過用寒藥或以誤食生冷致

傷脾胃而為泄瀉者亦多有之此一證也雖曰出疹而發而



實非疹毒之病矣。但察其別無熱證熱脈而兼之色白氣餒者，便須速救脾氣，急從溫補。宜溫胃飲五君子煎，胃關煎之類。主之若執謂疹毒不可溫，則無不危矣。此醫之當知本也。又如氣喘一證，大有虛實。蓋十喘九虛，若察其本非火證，又非外邪，而或以大瀉或以大汗而致喘者，必皆氣脫之候。此非六氣煎或貞元飲必不可也。凡此二者皆不可不加細察。而或者以氣促作氣喘，則萬萬大誤矣。又痘瘡總論中有因人因證之辨，與此麻疹實同一理所當參閱，故不可以麻疹之邪悉認爲實火，而不知虛火之爲害也。

徐東臯曰：痘難疹易之說，此俗談耳。其有胃氣原弱所感入淺，又或因瀉利而發有不快，或發之未透而隨現，隨隱久之邪氣漸入於胃，必瀉泄不已，出而復出，加之喘促，則必危矣。凡若此者，又豈可以易言哉？所以但有出疹，若見虛弱急當先補脾胃，其有欲出不出，急當托裏發表以助之。且首尾俱不可瀉，一如痘證同也。

疹禁忌 十三

凡疹瘡發表之後，紅影出於肌膚，切戒風寒生冷，如一犯之，則皮膚閉密，毒氣壅滯，遂變渾身青紫，而毒反內攻，煩躁腹痛。



氣喘悶亂諸證作矣欲出不出危亾立至醫家病家皆不可不慎

一疹瘡之證全在調治禁忌如鷄魚炙燻鹽醋五辛之類直過七七之後方可食之惟宜食淡不可縱口致生他疾也若誤食鷄魚則終身皮膚粟起如鷄皮之狀或遇天行出疹之時又令重出悞食猪肉則每歲凡遇出疹之月多有下利誤食鹽醋致令欬嗽則每歲出疹之月必多欬嗽誤食五辛之物則不時多生驚熱此痘疹之家皆所當慎也

疹發熱十四

瘡疹非熱不出凡疹子欲出必遍身發熱或煩躁或頭眩或身體拘急及既出則身便涼諸證悉解此一層疹子隨即收者極輕者也如疹子既出而熱甚不減此毒盛者也宜大青湯解其毒便澁者宜黃連解毒湯合白虎湯或大連翹飲解其裏大便不通者局方涼膈散加牛旁子主之

疹喘嗽十五

凡疹證多嗽此頓出頓入之勢也但有疹毒須假嗽多而散故疹後旬日之內尚宜有嗽切不可見嗽多而治嗽也宜慎之疹證屬肺與脾胃肺受火邪則嗽多嗽多則頓出頭面并及四



肢大腸受火邪則上連脾胃而爲泄瀉若早瀉則嗽必減而變爲喘蓋喘嗽二者皆屬於肺然嗽實喘虛得嗽者出得喘者入八則合眼多痰胸滿腹脹色白而毒不盡出證則危矣此疹之宜嗽不宜喘而最不宜於泄瀉也

疹吐瀉 十六

凡疹子初起發熱吐利純是熱證不可作寒論此乃火邪內逼上焦則多吐下焦則多利中焦則吐利並作自利者宜黃芩湯吐利者宜黃芩湯加半夏二錢生薑三片自利裏急後重宜黃連解毒湯合益元散

凡疹出一二日或三四日忽然大瀉嗽多者用升表之藥加以分利治之若瀉而兼喘復見悶亂搖頭者凶  
一麻疹現後大便下膿血或因泄瀉而變成膿血者或徑自利者但看瘡疹出多而色紅又多嗽者只宜表疹俟其收後方宜解毒兼治其痢

一疹之初起最忌泄瀉然亦有始終泄瀉而不妨者稟之強弱異也若因瀉嗽減而變爲喘者則危矣詳前喘嗽條

一身熱煩渴泄瀉者柴芩湯四苓散如熱甚或夏月益元散  
一疹後作痢亦有看手咬指甲撕口唇皮及咬人等證當以解



毒分利藥治之。若所下稠涎紅白相兼者，務要用解毒之藥。  
○若晝夜有三五十次漸減至二三次，或漸多嗽，右手一指  
脈漸起，清涕復來者，方可望生。○若痢變煤色，或成屋漏色，  
或如青菜色，肛門如筒，喘促音啞，飲食不進，午後腮紅，皆不  
治。  
景岳曰：自古方書凡發揮未盡，及用治未當者，間亦有之。而惟  
於泄瀉一證，則尤其為最。何也？蓋古人以泄瀉為熱者，什九  
故多用河間黃芩芍藥湯為主治，而不知凡屬泄瀉，最多脾  
腎虛寒也。即如出疹一證，雖有由疹毒而瀉者，然果係實熱，

多不作瀉，但致瀉者，率由脾胃之弱。若但知清火解毒，則脾  
必日敗而漸成屋漏。青菜色及氣促絕食不治之證矣。病而  
至此，豈猶熱耶？總屬誤耳。故凡治泄瀉者，即雖是疹，亦必察  
其有無熱邪。如無熱證，熱脈即當於痘瘡泄瀉條求法治之。  
庶最危者，猶可望其生也。故余於諸法之外，而獨言其要者，  
有如此。

疹飲食 十七

凡出疹者，多有五六日不飲食。此胃為邪氣所侵，亦為邪氣所  
養，故不食亦不妨。切不可着意治之，只宜治疹。疹瘡出盡，毒



氣漸解卽思飲食尤不可與麪食雖用粥飲每次只可少與  
候氣清神爽身全不熱漸漸加添但宜少而頻也

凡出疹之先平昔過用麪食者或正出時喫麪食者或胃氣漸  
開卽思麪食而用早者因動胃火以致清涕不來身體作熱  
兩眼看手咬指搥鼻撕口唇皮及撕眼剝毛者此皆疹後食  
復之病也當清肺解毒加消導之劑治之

疹飲水 十八

凡患疹之人不拘大小自起至收必皆喜飲涼水此不必禁但  
宜少不宜多宜頻不宜頓則毒氣隨之漸解

疹渴 十九

凡疹子渴喜飲水純是火邪肺焦胃乾心火內亢故也初熱發  
渴者升麻葛根湯加天花粉麥門冬渴甚者人參白虎湯合  
黃連解毒湯主之

疹汗衄 二十

凡疹子發熱或自汗或鼻衄者不須止之此亦散越之義汗者  
毒從汗散衄者毒從衄解但不可太過如汗太多人參白虎  
湯或合黃連解毒湯衄太多者玄參地黃湯

疹躁妄狂亂 二十一



凡疹有初熱而見煩擾譫妄狂亂者宜升麻葛根湯調辰砂益元散主之。

一疹收之後餘熱未盡日夜煩躁譫語狂亂者辰砂益元散用燈心湯調下或四苓散加燈草黃連黃芩調水飛硃砂五分主之。

疹咽痛 二十一

痘疹咽痛亦是常候乃火毒上薰而然也勿以喉痺同論妄用針刺蓋此非喉痺癰腫原無惡血可去也痘疹喉病只是咽乾作痛宜甘桔湯加牛旁子或射干鼠粘子湯細細嚥之更

以玉鑰匙吹之。

疹唇口瘡 二十三

凡出疹之先或有胃火及出疹之後餘毒不散此熱毒收於牙齦上下故齒唇口生瘡遇有此證每日用溫米泔水洗十餘次急用解毒之藥治之若或失治多變走馬疳也。

疹腹痛 二十四

凡疹初熱一日至五六日之間多有腹痛之證此大腸之火鬱於皮竅之中故作腹痛俱不可認作傷食用消導之藥或以手揉俱能致害但解疹毒毒散則腹痛自止最宜慎之。



凡疹後餘毒未盡隨當解之若停畱日久不解則必致喘嗽或喉中痰响或爲四肢冷痺或目無光彩面色青白或鼻孔如烟筒或嗽聲不出若右手一指脉輕取散亂重按全無則成難治之證矣

一疹子收後身有微熱者此虛熱也不須治之待血氣和暢其熱自退若熱勢太甚或日久不減宜用柴胡麥門冬散甚則黃連解毒湯或合人參白虎湯

一疹後熱不退而髮枯毛豎肉消骨立漸漸羸瘦爲骨蒸勞瘵之證者宜萬氏柴胡四物湯主之或蘆薈肥兒丸加當歸連翹治之遲則變證爲腫則露睛口鼻氣冷手足厥逆遂成慢脾風瘵瘵不治之證矣脾

一疹後熱不除忽作搐者不可以急驚風同論宜導赤散加人參麥門冬送七味安神丸小便清者可治短少者難治如見多痰或用抱龍丸或以四物湯加麥門冬棗仁淡竹葉甘草龍胆草黃連茯苓辰砂石菖蒲之類治之或以此藥爲末用蒸餅猪心血爲丸服亦可

一疹退後多有欬嗽之證若微嗽不已者此餘毒未盡也用清



肺飲加生甘草牛旁子主之。○若嗽甚氣逆發而不已者此肺中伏火金虛葉焦也宜清肺飲或清肺湯合人參白虎湯六一散之類主之。○若身熱頓嗽甚至飲食俱噎出或欬出血皆熱毒乘肺而然宜多用門冬清肺湯或加連翹或清金降火湯主之。○若欬甚而面浮目腫胸高喘急血出口鼻面色青赤昏躁搖頭者死證也。○又有肺氣本虛爲毒所逼而發喘不已但無嗽血噎食等證者宜用清肺飲倍加人參治之不可拘於肺熱之說而純用清肺解毒之藥也。

一疹後餘熱未盡或熱甚而失血者四物湯加茵陳木通犀角以利小便使熱氣下行則愈。若血在上者去川芎。

一疹後餘毒入胃久而不散以致牙齦黑爛肉腐血出臭氣衝人者名爲走馬疳用馬鳴散主之。甚者急用人中白蘆薈史君子龍胆草黃連五靈脂浸蒸餅爲丸滾水服之以清胃火。○若面頰浮腫環口青黑齒脫唇崩鼻壞者死證也。

一疹退之後飲食如常動止如故乃卒然心腹絞痛遍身汗出如水者此因元氣虛弱失於補養外雖無病裏實虛損偶然爲惡氣所中謂之中惡此朝發夕死之證。

附麻疹 二十六



痘之外有疹疹之外又有麻疹麻疹者亦疹之類卽班疹也但正疹則熱至五六日而後一齊湧出出皆粒粒成瘡非若麻疹之皮紅成片也且麻疹之出則不拘三四日以火照之遍身如塗朱之狀此將出之兆出則細碎皮紅成片如蚊蚤之迹者卽麻疹也亦或有六日始出出而又沒沒而又出不過一周時許世俗謂一日三出三日九出後方齊出透徹然亦有不拘者只三日間從面至胸背手足雖隨出隨沒然只要出透以遍身紅潤者爲美重者遍身膨脹眼亦封閉色有赤白微黃不同只要紅活最嫌黑陷及面目胸腹稠密纏鎖咽喉者爲逆發不出而喘者卽死所謂麻者以遍身細碎如麻無有空處故也然又有遍身但紅而絕無班點者是又謂之火丹亦其類也故痘家有夾疹夾麻夾丹等證總皆熱毒所致俱當詳辨也

一麻疹初起呵欠發熱惡寒欬嗽嚏噴流涕宜升麻葛根湯如蘇葉葱白以解肌切忌大汗○若潮熱甚者加芩連地骨皮○譫語者調辰砂益元散○欬嗽加麻黃杏仁麥門冬石膏○欬甚熱甚者用涼膈散加結梗地骨皮○泄瀉者宜四苓散便紅合犀角地黃湯○吐血衄血用犀角地黃湯加山梔



小便赤加木通○寒熱似瘧小柴胡湯

一麻疹已出煩躁作渴者解毒湯合白虎湯○喘而便閉者前胡枳殼湯加五味子○便秘甚者小承氣湯○譫語溺閉者導赤散○小便如泔者四苓散加車前木通○譫語如狂者解毒湯調辰砂益元散○大小便血者犀角地黄湯合解毒湯○吐血衄血解毒湯加炒山梔童便○泄瀉解毒湯或四苓散○喘兼泄瀉溺赤澀者柴苓湯○煩熱大渴作瀉者白虎湯加蒼朮猪苓○熱盛乾嘔者解毒湯○傷食嘔吐四君子湯○夏月因熱作嘔四苓散加人參

一麻證初起及已出已沒一切雜證俱與痘疹大同但始終藥宜清涼雖曰麻喜清涼痘喜溫煖不易常道然虛則補實則瀉寒則溫熱則涼方是醫家玄妙故治麻亦有血虛而用四物湯氣虛而用四君子湯傷冷則溫中理中之藥皆當因證而用也

一麻證收後餘毒內攻凡尋衣摸床譫言妄語神昏志亂者死○如熱輕而餘毒未除必先見諸氣色若有所見須預防之始終以升麻葛根湯為主或四味消毒飲或六味消毒飲解毒湯隨證選用仍忌魚腥葱蒜等物



水痘 二十七

凡出水痘先十數點一日後其頂尖上有水泡二日三日又出漸多四日渾身作痒瘡頭皆破微加壯熱即收矣但有此疾須忌發物七八日乃痊

一水痘亦有類傷寒之狀身熱二三日而出者或欬嗽面赤眼光如木或噴嚏或流涕但與正痘不同易出亦易靨治而清熱解毒為主

麻疹論列方 二十八

四君子湯 補

五君子煎 新熱六

六君子湯 補五

四物湯 補八

六氣煎 新因二一

人參敗毒散 散三六

化班湯 寒三

白虎湯 寒二

人參白虎湯 寒三

小柴胡湯 散十九

大柴胡湯 攻七

荆防敗毒散 痘三一

甘桔湯 因一七五

解毒湯 痘五一

黃連解毒湯 寒一

麻黃湯 散一

升麻湯 痘一三九

升麻葛根湯 散三十

透邪煎 新因二三

托裏散 痘四



局方涼膈散 攻十九

柴歸飲 新因十五

清肺飲 痘八七

清肺湯 痘一四五

柴胡橘皮湯 痘二九

仲黃芩湯 寒百五

一母散 痘百五十

射干鼠粘子湯 痘七七

麥門冬湯 痘一四二

導赤散 寒一二三

萬氏柴胡四物湯 痘一四三

四苓散 和一八七

柴苓湯 和一九二

養血化斑湯 痘十八

小承氣湯 攻二

益元散 寒百十二

門冬清肺湯 痘一四七

大青湯 痘一五三

瀉白散 寒四三

清金降火湯 痘一四九

溫胃飲 新熱五

貞元飲 新補十九

柴胡麥門冬散 痘二四

胃關煎 新熱九

抱龍丸 小八五

玄參地黃湯 痘八六

大連翹飲 寒七八

玉鑰匙 因一九三

七味安神丸 小七二

胡荽酒 痘百十八

馬鳴散 痘一三八

犀角地黃湯 寒七九

四味消毒飲 痘四八

六味消毒飲 痘四九

蘆薈肥兒丸 小百十四

桂枝葛根湯 痘三七




前胡枳殼湯 痘九四

黃芩芍藥湯 寒百九

備用方

具列痘疹方末所當詳閱





四

Handwritten text in vertical columns, likely bleed-through from the reverse side of the page. The characters are faint and difficult to decipher.

Blank, aged, yellowish paper surface with some texture and minor blemishes.



